


*KACYA NZAMBÌ*  
*ÛTUKÛ ÛSHINTULULA*  
*MMWÈNENU WENDÈ PA BÌDÌ*  
*BÌTÀNGILÀ DÌYÌ DYÈNDÈ ANYÌ?*

 Twinyikàayi mitù yetù. Mukalenge Yesù munanga, tudi badìsangìshe cyàkàbìdì mu Dìná Dyèbè, bindìle ne myoyi yìzùka diicikija dyà Bukolè bufùùludi bwà Nzambì bwà kutùfikisha ku dijingulula dyà kaaba kèètu ne patùdì biimànyìne, ne majitu atùdì bambùle, bu biikàle cisàmba cibìikila, citàpulula ne bàà pa buloba, cilàmbula kùdì Nzambì. Enzàku, Mukalenge, dilòòlò edi ne, mabènesha a Nzambì àtùleejè njila ne àtùludikè mu bintu bitùdì twenza anyì twamba, bwà byàmònakù mwà kufila luumù ne butùmò ku Dìná Dyèbè. Amen.

<sup>2</sup> Ndi ne disànkà dyà kwikala mwalùkile mu èkèleeziyà dilòòlò edi ne kwikala neenù nwènù bananga bàanyi. Ne ndi mumanyè ne kùdì luuyà, kàdi ndi mfùma ku dibìikila mukàjàanyi, ngeela meeji ne mmakùmì citèemà ne byà mu njila kuntwaku, makùmì citèemà ne yìtaanu anyì makùmì citèemà ne yìsambòmbò anyì cintu kampànda, ne kùdì luuyà kutàmba mùdiku mwab'ewu. Nènku ndi ngenda ngiibidilanagana ne kuulu kwà luuya mpindyewu. Pa nàнку, kàdi ndi ne disànkà dyàbùngì dyà kwikala ku tabernacle eku mu cikondo cilenga cyà Paasàkà eci.

<sup>3</sup> Nènku ncyèna mwà kwamba ne ndi ndòmba dilekela bwà Dyiisha dile, dile adi mu dindà emu nànsha, kàdi ndi... Bivwa ne, ncivwa muswè—muswè kunùbùdisha lutùlù kàdi pashìshe kulwakù cyàkàbìdì dilòòlò edi to. Kàdi mvwa—mvwa muswè ku—kunùfikishilakù Mukenji awu, wà ne nudi citùpà cyà dibìikà dyà ku lufù edi. Nwamònu anyì? Nènku kanùtácishi kàbìdì meeji to, pa Bwalu abu, nwamònu's. Cyònkòmekelàayi ànuPù cyanààna! Kakwèna cintu nànsha cìmwè, mwaba nànsha wùmwe, cidìku mwà kunùtápulula naaWù to; cintu nànsha cìmwè; bakùbìbwe Cyendèlèlè mu Bukalenge bwà Nzambì. Pàdì Nzambì mukutwè Citampì Cyèndè, udi mu lwendu mutàngile ku ndekeelu wa kwèbè kùyaayà.

<sup>4</sup> Pàdì bukalenge bütwa citampì pa dibùki, beena kàwulù bàtwa citampì ku ciibi, dikaadikà adi kabèenakù mwà kudilenga

to ànu pàdidi dikafika kùyaayàdi.

Pàdi Nzambì ùtwa muntu Citampì Cyèndè, ne Citampì n’Nyumà Mwímpè, pàdiYe ùtwa muntu citampì mùshindù awu, awu wàyì kwèndè kwà Cyèndèlèèlè. Kènàku kàbìdì, nànsha bìshi, mwà kwalukila kàbìdì paanyimà to. Bwalu vùlukàayi ne, Efèsò 4.30 ùdi wàmba ne: “Kanùbungamiji Nyumà Mwímpè wa Nzambì to, unùdì batwibwe nendè citampì bwà misangu yònsò.” Nwamònu’s, udi mutwibwe citampì bwà kashidi. Udi mutwibwe citampì, bwà Cyèndèlèèlè, mu Bukalenge bwà Nzambì, kùdì Nyuma Mwímpè. Mpindyewu elànganaayi meeji pa bwalu abu!

<sup>5</sup> Dìbà adi, wèwè, dyabùlù neàkutuutè bisùsù, ne neàkwambilè maalu ónsò, ne neàkufùndè, ne—ne neàteetè bwà kukwelesha meeji ne kí ncyùdì to. Kàdi wèwè kùmutèèlejìkù to.

<sup>6</sup> Mpindyewu, wèwè udi mumanyè ne ukàadi mumùke ku lufù muyè ku Mwoyi. Udi mumanyè ne bintu byúvwa munangè kwónsò eku abi, kùcyèna kàbìdì mubìnangè to. Udi mumanyè ne ukàadi mwitàbùuje Dìyì dyónsò dyà Nzambì. Udi mumòne Nzambì ùkwàta mudimu munkacì mwètù mene, kakùyi... Bileeji bìdì kabìyi bìpangila byà ne Yèyè ki “NDI” munène awu. Wèwè wamònu ne cyónsò cikaadiku cyambiibwe mu Dìna Dyèndè, kacya cintu nànsha cìmwè kacitukù cyambiibwe mu cipròfetà mu Dìna Dyèndè kaciyi cyenzèke menemene anu mùvwàci cyambiibwe to. Nànsha mene too ne ku maalu a mamanya, fòtò, bibèjibeji, byamù byà fòtò, bafùndi, ne bikwàbò byónsò, bìdì ne cyà kucijingulula. Nwamònu’s, nànsha bòbò baswè nànsha kabàyi baswè, Nzambì ùdi ùbàfikisha ku dicyènza, nànsha bìshi, nwamònu’s, bwà kucìmanyishisha.

<sup>7</sup> Mpindyewu, biikàle kasùmbù kakesè. Vùlukàayi ne, kí ncisùmbù cinène cìdiYe ùvwila to. “Kanùcìinyi to, nwènù kasùmbù kakesè kàà mìkòòkò; ndiswa dîmpè dyà Taatù wenù...” Nwamònu anyi?

<sup>8</sup> Ndi muswè nnùshìlèku dīyì kampànda, dyà dìnùpapula, kumpalà menemene kwà twètù kujidila mwambi kampànda mu mudimu. Nènku eci ncyà cìpapulangana, kàdi ànu bwà nwamòna mwà kumanya. Mpindyewu, ncyèna ngamba ne eci nnombà menemene to, kàdi ndi muswè kunùshiya ne cyòci eci.

<sup>9</sup> Ncyèna mumanyè bantu kaaba aka ní bàkaadikù bamòne disopakaja dyà mamiinu a nyama. Dyòdi diine, mèmè ncyèna ndiitabuja to, kàdi nkàadi mutàngile bàdyènza. Ne nkàadi mubàmòne bààngata bilùmè byà nyama mulùmè, ànu búngì bukùmbàne, bwà bufwànyine kwangacila ku kaacyamù kakesè, bu mùdì kacì kàà kwela ku ménù, ne bàbitèèka pa katùpà kàà marbre. Ne kukùdimuna tumwènù atu tùdì túbìdyundishà, ncyèna mumanyè ne mmisangu búngì munyì to, too ne pàdì bilùmè abi...Mwaba wùdì kùyi mufwànyine kumòna kantu nànsha kàmwè ne dīsù dyà mubidi edi to, ku kamwènù kàà ciibidilu aka. Kàdi pàdìbi bidyundishiibwa, misangu

lukàmà anyì lukàmà ne makùmi àtaanu, udi mwà kumòna mu kamata kakesè kàmwèpelè aku, kàà bilùmè, pàmwàpa kuumukila ku makùmi àtaanu too ne ku lukàmà lwà tuubivuba tukesè tütüpika. Kàbidì, mu cikàjì mùdi mùlwa mayi búngì cyanààna, mu—mu bilùmè amu. Mpindyewu, pàditu—pàditu tusangishiibwa pàmwè, mpindyewu, túbidì twà kumpàlà tùdi túsambakeenà ne tùpetangana atu. . .

<sup>10</sup> Kùdi ànu kàmwèpelè pa mùlìyò mujimà awu kààshààlà ne mwoyi. Kacya nukààdikù bakwèlèlè meeji anyi? Twòtò atu tùdi civuba cyà mwomùmwè, ne diyi dyà mwomùmwè, twònsò túbidì atu ntufwànàngàne ànu menemene, kàdi kùdi ànu kàmwèpelè kààshààlà ne mwoyi. Kàdi kî mbikòsa ne nkèpì kàfikà kumpàla mwaba awu to. Bwalu, misangu mikwàbò diyi adi, paanyimà menemene apu, ne civuba ncifwànyine kwikala munkàcinkacì mwà bilùmè abi, ne netùbandanganè pamutù aka ne kakwàbò. Bidi bìkèngela ànu Meeji kampànda bwà kumanya ne neciikalè mwànà wa balùme anyi wa bakàjì, wa nsukì mikünze, wa nsukì mifiike, anyi nì ngwa bishi. Ndisungula dyà Nzambì. Kacyèna mwà kwikala cingà cintu to. Disungula!

<sup>11</sup> Nànsha mu dileidiibwa dyà mu bufùki, ndisungula, bwà ne neciikalè mwànà wa balùme anyi wa bakàjì, anyi nì ncinyi cyònsò ciikalàku aci. Nènku pàdi kaacivuba kakesè aku kàdinyònda kàbwela mu diyi dikèsè adi, ne kaamukilà kakesè aku kàkòseka, cidi cibanga mufùbà wà mwongo wà mwànà wa cyònsò cidici aci; nyama, mwànà, anyi cyònsò cidici aci. Nènku bikwàbò byà ku bivuba mùlìyò mujimà abi. . . Mayi mùlìyò mujimà, bivuba mùlìyò mujimà, kàdi ànu cìmwèpelè ncidi cishààlà ne mwoyi. Byònsò byà mwomùmwè, kàdi Nzambì ngudi usungula ku disungula cyàshààlà ne mwoyi aci, ne bikwàbò byònsò abi bibütuka. Cìmwè pa mùlìyò mujimà!

<sup>12</sup> Pààkuumukà Izàlèlèlà mu Èjiipitù, bònsò bàvwa bìtabuuja mukenji wà mupròfetà umwèpelè. Bààkamòna bimanyinu byà Nzambì, kùdi Mòsà. Yònsò wa kùdìbo wàkabimòna. Ne bònsò muntu ne muntu bààkapàtuka mu Èjiipitù, ne bààkapicila mu Mbù Mukünze, ne bààkabàtìiibwa mu Mòsà. Muntu ne muntu wàkamòna bukòlè bwà Nzambì bùmulenga, pàvwàye wimba mu Nyumà apu; ne pàvwà Miliyàmà wimba dikasa, ubànda ùpweka ku mwelelu wà mbù apu. Yònsò wa kùdìbo, dilòòlò dyònsò, ùvwa ùdya manà mapyamàpyà, a mu dyulu àpàtukila mu maulu. Yònsò wa ku bóbò abu wàkanwà ku Lubwebwe lwà nyumà lwàkatuuciibwà alu. Kàdi kùvwa bantu miliyò yibidì bààkuumukà mu Èjiipitù. Mbantu búngì munyi bààkafikà mu buloba bulaya? Bàbidì. Umwe pa mùlìyò mujimà! Bònsò abu bàvwa penyì? Yesù wàkamba ne bààkabütuka. “Baataatù bèènu bààkadyà manà mu cipèlèlà, mu cipòlòlò cyà bidimu makùmi àsàtù, kàdi Mémè ndi nzwàmbila ne bònsò abu mbafwè.”

<sup>13</sup> Mpindyewu kùdi beena Kilstò batwè ku miliyò nkàmà yitaanu pa buloba dilòòlò edi, tubadilakù ne beena Kàtòlikè,

beena Mishòònyì, ne bònsò. Bu ne bìvwa bikèngela bwà Yesù àlwe mu Dyambwibwa adi, bilondèshile cìndi mfùma ku dyamba eci, s'nkufwànyìne kujìmina bantu nkàmà yìtaanu pa buloba dilòòlò edi, bayè mu Dyambwibwa. Ne kùdi pàmwàpa búngì abu bàjìmina ditùkù dyònsò, bwà tubala mu matùngà ònsò, bàdìbo kabàyikù bamanyè kùdìbo bayè to. Pa nàнку ncifwànyìne kwenzeka pa dìbà kanà dyònsò, nwamònu's.

<sup>14</sup> Kaa, beena Kilistò, twikalàayi bavwàle byà mvità byà Nzambi. Twènzàayi byònsò bitùdiku pèètù bamanyè mwà kwenza abi, bwà kuMukwàcila mudimu, kuMunanga, ne kwindila cikondo cyà butùmbi aci.

<sup>15</sup> Mpindyewu, kakwàkupàtuka miliyò minène ne misùmbà yà bantu mu lukòngò kampànda ne bàabwelàmù to. Kabèèna—kabèèna mwà kwikalakù to.

Mpindyewu, vùlukàayi ne, ditùkù dyònsò dicyacyà dilililà edi didi dyenza ndekeelu wa lukòngò kampànda, ditùkù dyònsò edi. “Ànu mwàkadìbi mu matùkù a Noà, ki mwikalàbi kàbidì ku dilwa dyà Mwànà wa muntu, mwàkasùngidiibwà misùukà mwandamukùlù ku màyi.” Kàdi ditùkù dyònsò dicyacyà dilililà edi didi dyenza ndekeelu wa cikondo cyà bidimu makùmi ànaayi bwà muntu kampànda, bwà bàmwè. Nwamònu anyi? Ne ditùkù dyònsò, bantu búngì kampànda bàdi bàtwibwa citampì mu Bukalenge. Dìngà ditùkù, ditùkù dyà ndekeelu nedilwe.

Twikalàayi batwishìibwe mpindyewu, patùcidì ne meeji ètù mu òwò apa. Ne mu èkèleeziyà, ne munkaci mwà cisàmbà, mùdì Nyumà Mwìmpè muDimanyishe bikolè kutùdi emu, twikalàayi batwishìibwe ne byònsò mbìmpè, ne bìdi bishààla bìmpè, kumpalà Kwèndè.

<sup>16</sup> Kwìmanyikù to. Kwìkishikù to, muunyà ne bufùku, too ne pìikalà Bukolè bufùululudi abu bukuumùshe ku bintu byà pa buloba, bukubwejè mu Bukalenge bwà Nzambi. Ne nwènù bàdi bulelèlà babwejiibwe mu Bukalenge bwà Nzambi ne bafùululula kùdi Nyumà wa Nzambi abu, disànkà kaayi's wè! Ne binsònjì byà disànkà bìvwa bikèngela twètù kwikala ku binù, muunyà ne bufùku, twela Nzambi twasàkidila bwà bìdiYe mwenzè.

<sup>17</sup> Dilòòlò edi tudi ne dishintuluka ndambù mu mudimu. Tudi mwab'ewu ne mwanèètù mulenga, Mwanèètù Capps. Ùtu mulwè kutùdi mufùmìne mu èkèleeziyà wa ba-Nazaréens. Ne ngeela meeji ne aci ncyà bushùwà's, Mwanèètù Capps? Ùdi ùjinga dilòòlò edi kujidiibwa mu mudimu wà bwambi kutùdi, ku dimutentekela dyà byanza.

<sup>18</sup> Twètù katùtu ne mikànda yà kupèèsha muntu to, nànsha mùtùdi bamanya ne tudi...Tuvwa ànu bafwànyìne kwikala ne mikànda's, kàdi tudi twitabuuja ne mwambi mulelèlà, mujidiibwe bu mwambi, yèndè mikànda yìdi mu Dyulu. Nwamònu anyi? Ne yèyè—yèyè ùdi ne bukenji bwà kuyiisha Bible pàdi ànu Nzambi ùmanyisha mwoyi wèndè ku Bible.

Tudi twitabuuja ne ki yèndè mikàndà ya dijaadikiibwa naayi nyòyì ayi.

<sup>19</sup> Nènku, mpindyewu, Mwanèètù Capps ùtu mujidila byà bimanya kùdì bònsò mu—mu èkèleeziyà wa ba-Nazaréens, kàdì dilòlò edì mmuswè bwà bakùlù, ne bakwàbò bàmutentèkèlè byanza bwà dimujidila, bwà kuyayè ne Mukenji ewu. Cintu kaayi cyà bukitù's wè!

<sup>20</sup> Ndi—ndi muumvwè milubù kacya ànu ngíkala mu Tucson, miine ayi milubù milenga yà dikèma, yà Mwanèètù Capps ewu mu dikwàcishangana dyèndè mu mudimu ne Mwanèètù Neville, udi mwambùle cimunyi cyà Bukènkè ne bukitù bwònsò mùdì balùme bàbìdì aba mwà kwambula amu. Tutu batentèkèlè Mwanèètù Neville byanza, kàdì Mwanèètù Capps to. Nènku ndi muswè bwà aba bàdì bambi abu, Mwanèètù Jackson ne bakwàbò, pìikalàbo kaaba aka, ne Mwanèètù Ruddell ne bakùlù bàà èkèleeziyà ewu, bu bòbò mwà kulwakù mwab'ewu bwà katanci kakesè cyanàànà mpindyewu, bwà kutentekela Mwanèètù Capps byanza. Nènku. . .

<sup>21</sup> Mpindyewu tudi tusangana ne, mu Bible, ki mùshindù wùvwàbò bàcyènza, bàvwa bàbàtentekela byanza ne bàbàtèeka ku lusekè dìbà adì. Ne mùshindù awu ki wàkenzàbo Timòtè. Mbambè ne: “Ku dipà dīvwa mu wèwè edì, kubangila ànu ku kakwèbè-mukàjì Loīs. . .” Bàkaavwa bacimòne ne, kùvwa dipà kampànda mu muntu awu, dīvwa dilwè kùdìye kupicila kù bakùlù, ku dimutentekejila dyà byanza.

<sup>22</sup> Mpindyewu, bàna bèètù beena mvùla mishìishe, bàna bèètù beena mvùla mishìishe, bàtu, nànsha nànkù, bapetè cibwejakàjì mwaba awu. Bàtu bòbò beelè meeji ne bàvwa bamupèeshe dipà, mu kwenza kwà nànkù. To, dipà adì dikaavwa mu yèyè, ki kumutentekelabò ànu byanza cyanàànà bu dimanyisha dyà ne bàvwa bìtabuuja ne Nzambi ùkaavwa mumanè kutèeka dipà adì munda mwèndè. Nènku bààkadìmanyisha, ku dimutentekela dyà byanza.

<sup>23</sup> Nènku bantu bàdì kaaba aka mu èkèleeziyà ewu aba, bàndì mèmè ngiitabuuja ne mbakwàciibwe munda mwà musùuka wàbò kùdì Bukolè Bwèndè bufuùluludi; bu nwènù bàna bèètù mwà kusemenakù kùnèèku mpindyewu mene, Mwanèètù Ruddell ne bakwàbò bònsò bàà kunùdì bàdì mu èkèleeziyà emu abu, ne bakùlù ne bàà mu èkèleeziyà myànà-yètù yà mu nyungulukilu emu abu, bwà kutentekela Mwanèètù Capps byanza, bwà kujidiibwayè ku ditwà dyètù dyà cyàlà, kumpàla kwà batèeleji aba, ne kutùmiibwayè bwà kuyiisha Èvànjeeliyò wa Mukalenge Yesù, kwònsò kùdì Nzambi mwà kumubiikila aku. Yèyè ùdì ùlwa. . .

Yèyè ùkaadi umwe wetù, ku Dilediibwa. Yèyè ngumwe wetù bwalu mmwitàbùùje Mukenji. Yèyè ngumwe wetù bwalu—bwalu ùdì ùtwa Bulelèlà bwà Dìyì nyama ku mikòlò. Nènku

tudi baswè bwà Mwanèètù Capps àjidiibwè byà bantu bônso bamanyè, kumpàlà kwènù, ku ditentekela dyà byanza ne, yèyè ngumwe wetù.

Èyo, Mwanèètù Ruddell, Mwanèètù Capps, Mwanèètù Neville. Mwanèètù Junior Jackson, yónsò wa ku bambi bakwàbò abu mwab'ewu, ncyèna ànu mumanyè ne bàdipù búngì kaayi to. Ncyèna . . . Ngeela meeji ne bàdi ne masangisha àbò sungasunga dilòdò edi. Nènku lwàku buludi kùneeku, Mwanèètù Capps.

Mpìndyewu Mwanèètù Hunter ùdi penyì ne bakwàbò bàà ku New York abu, ndi . . . Mwanèètù Anthony? Ngeela meeji ne mbaalùkile's. [Mwanèètù Neville ùdi wamba ne: "Mwanèètù Anthony's nyèyè wàwa paanyimà pààpa."—Muf.]

Yónsò wa kunùdi nwènù bakwàbò bàdi mwab'ewu, bàdi neetù abu, mònà's, tudì bafwànyine kwikalakù ne disànkà dyà nwènù kulwa kùneeku ne kwimana pàmwè neetù mpìndyewu, bu dijingulula dyà ne tudì twitabuujà ne ki cìdì Mwanèètù Capps . . .

Mbanganyi bàà kunùdi aku mwab'ewu bàdi bamanyè Mwanèètù Capps? Elàayi byanza muulu. Èyo, pwekèshaayi byanza. Mbanganyi bàdi biitabuujà ne yèyè mmusadidi wa Nzambi? Elàayi byanza muulu. Tudì bamunangè, bu mwanèètù.

<sup>24</sup> Mpìndyewu ewu kî mmùshindù mujaalàme menemene wà citùdi bafwànyine kubìikila ne ndijidila to, kàdi ndi muswè bwà batèèleji aba, mèmè ncyèna mufwànyine kwimba musambu ewu to, kàdi ndi muswè bwà nùnkwaçishèku bwà kuwùteeta.

<sup>25</sup> Ditùkù kampànda adi mupròfetà kampànda wàkaya ku cyoshelu, mu ntempèlù. Ne pàvwàye ùsanganyiibwa ku ntempèlù aku. . . Ùvwa muntu mwimpè, kàdi ùvwa ànu mweyèmène bukolè bwa Uzìyà mfùmù awu, ne yèyè ùvwa— ùvwa muntu mwimpè. Kàdi nànsha nàнку, dínghà ditùkù, ku ntempèlù aku, kumònayè cintu kampànda, pààkabwelàye mu cikèèna—kumòna, cìvwàye kacya kàyikù mwanji kumòna kwónsò aku to. Kumònayè Banjèlo, biikàle ne màpwàpwà, bàbùùka bàya kumpàla bàya paanyimà, mu nzùbù mujimà amu, bèèla mbilà ne: "Wa cijila, wa cijila, wa cijila, Mukalenge Nzambi wa Bukolè bwónsò!" (Seemènaaku apa, mwanèètù. Èyo. Nwamònu anyi?) "Wa cijila, wa cijila, wa cijila, Mukalenge Nzambi wa Bukolè bwónsò!" (Ben.)

<sup>26</sup> Ne pààkenzàye nàнку, makunji a ntempèlù àkanyunga. Ki yèyè ne: "Dyàkabi dyànyì! bwalu ndi muntu wa mishìkù mibiipe." Mu Bwikadi bwà Nzambi yèyè wàkajingulula ne, nànsha mùvwàye mupròfetà amu, ùvwakù ànu mupiiile. Wàkamba ne: "Ndi muntu wa mishìkù mibiipe, ne ndi musòmbèle munkaci mwà bantu bàà mishìkù mibiipe."

<sup>27</sup> Ki umwe wa ku Banjèlo abu kubùùkayè, ne kwangatayè dikàlà dyà Kapyà ne kulengayè mishìkù yèndè ayi, kwambayè ne: "Ambà cipròfetà, wèwè mwànà wa muntu!"

Udi mwà kutùpèeshakù cyonà cyà cyòci aci anyi, mwanèètù wa bakàji, bu wèwè mwà kuswà. Mbanganyi bàdiku bamanye musambu ewu? Tùyaayaaku túng, citùminyi cìmwèpelè. Èyo.

Dikàlà dya kapyà pàakalengàdi mupròfeta,  
Dìmuvwija mukezùke ànu ne mwèndè  
mwònsò,

Pàakambà Dìyì dya Nzambi ne: “Wàya pa  
kaaba kèètù nganyi?”

Dìbà adi kwandamunayè ne: “Mmémè ewu  
ntùmaaku.”

[Katùpà kàà mukàbà wà mèyi munda  
mutupù—Muf.] . . akùlà, Mukalenge wanyì,  
Akùlà, ne mèmè nêngiikalè ne lùkàsà bwà  
kuKwandamuna;

Akùlà, Mukalenge wanyì, akùlà, Mukalenge  
wanyì,

Akùlà, ne mèmè nêngàdamunè ne:  
“Mukalenge, ntùmaaku.”

Miliyò mpindyewu mu mpèkaatù ne bundù  
bàdi bàpùnga ne lufù,

Tèèlejà mwadi wàbò wà dibungama ne  
kànjabàla;

Kolèshà, mwanèètù, kolèshà ùye  
kabàkwàcisha;

Andàmùnàku ne lùkàsà lwònsò ne: “Mfùmù,  
mmémè ewu.”

Akùlà, Mukalenge wanyì, akùlà, Mukalenge  
wanyì,

Akùlà, ne mèmè nêngiikalè ne lùkàsà bwà  
kuKwandamuna;

Akùlà, Mukalenge wanyì, akùlà, Mukalenge  
wanyì,

Akùlà, ne mèmè nêngàdamunè ne:  
“Mukalenge, ntùmaaku.”

Bakùlù bàlwe bàmunyùngùlùkilè mpindyewu ne bàtentekelè Mwanèètù Capps byanza. Twinyikàayi bònsò mitù yètù.

<sup>28</sup> Nzambi munanga, makunji a ntempèlù nyewù ànyungù cyàkàbìdì, ne patùdì tumòna Nyumà wa Mwoyi mufùùluludi awu ùkwàta mudimu mu mwanèètù. Nyewù ndòmba, Nzambi, pàdiye ùmvwa cyòci eci cyùmukila mu Dyulu, cyàmba ne yèyè ùdi ne cyà kuya apa. Nyewù tumutentekela byanza, twètù bu bakùlù Bèèbè, Mukalenge, ne tumwela mwoyi wà ku cyanza wà buunyànà; ne tumutentekela byanza, ne tumusambulujila mabènesha a Nzambi, bwà Wèwè ùlaabè mishìkù yèndè, meeji èndè, buumùntù bwèndè bujimà. Ne swàku bwà àngatè Mukenji wà Èvànjeeliyò ewu àye naawù ku mutanta wònsò ne ditumba dyònsò kuWàmubiikilà aku. Enzàku nànkù, Mukalenge. Nyewù

tuKupèèsha mwanèètù wa balùme, bu musadidi Webè, mu Dîna dyà Yesù Kilistò. Amen.

<sup>29</sup> “Yishà Dîyi,” mwakùnyàànyì wa balùme. “Nànsha mu cikondo cyàbì, anyì kabiyi mu cikondo cyàbì; dyulà, tàndishà, ne mwoyi mule wònsò ne Dilongesha.” Nzambi àkubènèshè, mwanèètù.

<sup>30</sup> [Mwanèètù Ben Bryant udi wàmba ne: “Mwanèètù Branham, udikù mwà kuntentekela byanza anyì? Bàdikù mwà kuntentekela byanza anyì? Ndi muswèku bwà bânjidilè.”—Muf.] Wèwè kùtu. . . ? Ncivwakù mumanyè ne kùtu mwanji kujidila to.

Mwanèètù Ben, ewu, mmulwè kutùdì. Ngeela meeji ne ùdì ùyiisha kùkaadi cikondo kampànda. Kàdi, kabàtu banjì kumujidila (Pàànyì’s mvwa ngeela meeji ne bàkaavwa bamujidile; ki bwà cinyì ngààmubikidi bwà kulwayè apa.) byà bantu bònsò bamanyè, anyì bamutentèkèle byanza mwab’ewu to.

<sup>31</sup> Mpindyewu, mukàji wa Mwanèètù Ben ùdì mwaba kampànda kaaba aka, ne yèyè mmuntu wa mushinga. Ùvwa muyiishi mukàji. Kàdi pààlubò kusèlangana yèyè ne Mwanèètù wa balùme, ne yèyè kumufikisha ku tabernacle, pààlu mukàji kumòna ne kuumvwa Dîyi, pèndè inábànza mutekète mulenga kwìsù mwikàle ne buumuntu bulenga, kàdi pàmònyè ne bìvwa bibi bwà bakàji kwenzabò aci, kucikèlayè ku luseke; ki kumwèkaci ànu bu ne cyàpònenyi pambidi pàà bàyendè. Aci cidi mu cyòci. Aci ncyà bàpostòlò. Ki mùshindù wùwàbi bikèngela kwikalabi.

<sup>32</sup> Mwanèètù Ben ùtu wàngata mikàbà yà mèyi, mùndi ngumvwa, yèyè ne mukàjèndè. Bātu bakabwela mu myab-. . . mu myaba yà ku ncyàmà, kule menemene mu mikùnà mwàmwa, mu bisuku ne meetu, ne bèèla mikàbà yà mèyi eyi ne bèèla nsèke pa mikàbà yà mèyi apu. Misangu yàbùngì bātu bàbìipata, bàbèèla pambèlu, bàbàkùpa pambèlu. Ki citùdì tutèkemena ncyòci aci. “Bwalu aba bònsò bàdi ne nsòmbelu wa difwàna dyà Nzambi mu Kilistò Yesù nebàpetè dikèngeshiibwa.”

<sup>33</sup> Mbanganyi kaaba aka bàdi bamanyè Mwanèètù Ben? Mbanganyi bàdi bìtabuuja ne yèyè mmusadidi wa Nzambi, mukumbànyine dibènesha ditùdì baswè kumulòmbela kùdì Nzambi edi? Nwamònu’s, yèyè kî mmwenyi to. Ùdì neetu kùkaadi bidimu ne bidimu. Ntu mèmè mumumanyè bu muntu wa didìpwekesha. Yèyè ùdì bu mèmè kunù; ùtu wènza bilèma byàbùngì. Twètù bònsò tutu tubyènza. Cìntù mèmè munangè kùdì Mwanèètù Ben ncyà ne, yèyè ùtu muswè kukalabila ne panshì ku binù bwà kucilongolola.

Nènku pàtèèlejiyè, ditùkù adi, *Dibàkà Nè Difwà Dyà Dibàkà*, yèyè ne mukàjèndè bàkaavwa badìlongòlòle bwà kutàpuluka, bwalu yèyè mmumunangè, ne mukàji mmumunangè, kàdi mbaswè kwikala bakumbànàngane ne Dîyi dyà Nzambi. Cyònsò



civwà Dìyì dyambè aci, ki civwàbo bàkèba. Ndi ndòmba bwà Nzambi àbeneshèku Ben ne mukàjèndè, ku mudimu Wèndè.

Tütentekelàayi mwanèètù wa balùme byanza.

<sup>34</sup> Nzambi munanga, nyewù tutentekela Mwanèètù Ben byanza, bu cimanyinu cyà ne tudi bamunangè. Ne tudi twitabuuja, Mukalenge, ne yéyè mmuswè kuKukwàcila mudimu, bwà kutùmiibwa ne mikàbà yà méyì eyi, bwà kukayèèla munkaci mwà bantu kampàndà bàà ku mikùnà mu myaba yà ku ncyàmà menemene mwàmwa mùdì pàmwàpa bààbùngì bàà kutùdì kabàyikù bafwànyine kafika to, kàdì pààbì's Mukenji wùdì ne cyà kuya pa buloba bujimà. Tudi tulòmba bwà Wèwè kubènesha mwanèètù, ne kumupèèsha Nyumà Webè, ne bwà Àlwekù pambidi pèndè. Nènku muleejèku njila, ne muludikèku yéyè ne mukàjèndè ku myaba ayi yidì pàmwàpa musùukà wùmwèpelè wùsanganyiiibwa kuntwaku, ne biibi kabyèna mwà kwinjidiibwa pàdì mùkòòkò wùmwèpelè awu kawùyi mubwejiibwe to. Wèwè kùtu usànkishiibwa ne makùmi citèèmà ne citèèmà to. Ne... Dìná dyònsò didì mu Mukàndà didì ne cyà kubwejiibwa. Bàkwàcishèku, Mukalenge, patùdì tumutentekela byanza apa, bu dimuswikakaja kutùdì bu mwanèètù. Ne dikwàcisha dyètù ne disambila bwà Wèwè bwèndè yéyè, nebiye nendè. Nènku tudi tulòmba bwà Wèwè kumubènesha, Mukalenge, kwònsò kwàyàye aku. Mu Dìná dyà Yesù. Amen.

Àkubènèshè, Mwanèètù Ben! Mwoyi wà ku cyanza wà buunyànà wutùdì tukwela, twètù bu bambi neebè. Nzambi àkubènèshè, mwanèètù.

<sup>35</sup> [Mwanèètù Earl Martin ùdì wàmba ne: “Mwanèètù Branham, udikù mwà kuntentekela byanza anyì, kunjidila bwà mèmè kwenza mudimu bu mpaasàtà?”—Muf.] John Martin... [“Earl.”] Earl.

Mbanganyi bàdì bamanyè Earl Martin? Mbanganyi bàdì biitabuuja ne yéyè mmusadidi wa Kilistò? Mmulwè kutùdì ùmukila mu... ngeela meeji, mùvwàye kale amu, mu kasumbù kampàndà kàà beena Mpenta, ne mpindyewu ndi ngeela meeji ne ùdì mpaasàtà ne wènza mudimu wà mudikàdile.

<sup>36</sup> Mèmè ntu mumanyè Earl bu musadidi mulelèlè wa Kilistò. Neyàdyàkupwàku mwoyi cyenzedi cimwè eci to, byàbùngì bikaadi byenjiibwe, kàdì ànu cyenzedi cimwèpelè eci cyà Earl. Ndi mvùluka dilòòlò kampàndà dyàkamubiikilàbo pàmvwà nsanganyiiibwa mu Dallas, mu Texas; anyì ngee—ngeela meeji, to, mùvwa... [Mwanèètù wa bakàji kampàndà ùdì wàmba ne: “Beaumont.”—Muf.] Beaumont, mu Texas, mmwòmò, mwanèètù wa bakàji. Ki bòbò—bòbò... Mwanèndè wa mu dibòko ùvwa mulààdika, ùpunga ne lufù, ne bèèla meeji ne ùkaavwa mumanè kufwà. Kàcivwa kàbìdì wèyela to. Ki Earl kwenzayè ne mwèndè mwònsò bwà kufikayè ku cibambalu cyànyì, yéyè bu papa, ne makaaya makòbàme, kwinamayè kumpalà kwànyì, bu mùmvwà

mu bulaàlù. Mémè kubùnguluka e kuumukamù; kungeelaye mabòko kunshingù e kwambayè ne: “Mwanèètù, ndi ngiitabuuja ne wèwè udi mupròfetà wa Nzambi. Ntu misangu yònsò ànu mwitabùùje nànkù. Nènku bu wèwè mwà kwamba ànu diyì cyanàànà, nànsha mùkaadi mwanàanyi wa mu dibòko awu mufwè, kàdi neikalè ne mwoyi.” Ki mwanèndè wa mu dibòko awu kwalukilayè ku mwoyi, ùdi ne mwoyi.

<sup>37</sup> Nudi nwitabuuja ne yèyè mmukùmbànyine cyanza cyà buunyànà cyà kùdi beena kwitabuuja aba anyi? [Disangisha didi dyàmba ne: “Amen.”—Muf.]

Tùsambilàayi, bânà bèètù, patùdi tumutentekela byanza apa.

<sup>38</sup> Taatù wa mu Dyulu wa musàngeelu, nyewù tutenteka byanza, cyàkàbìdi, pa Mwanèètù Martin. Tudi tumutùma, Mukalenge, ku bitùpà byà kuleekùle byŪdi mulongòlòle bwa ne ki kùvwàbi bikèngela bwà kuyayè; nànsha penyì, bìikalè bààbùngì anyì bakesè, mu njila micìngùlùke, mu bibeeba, ku myelelu yà mpangu, byòbi mwà kwikala nànkù. Nànsha kwikàle penyì, Mukalenge, swàku bwà mabènesha Èbè ikalè èndè nendè. Tudi tumutentekela byanza patùdi tumujingila dyàkalenga dyà Kùdi ne tumupèèsha mabènesha ètù apa, bwà Nyumà udi pambidi pèètù twètù ewu, Mukalenge, àmufile, ne àmulèejèku njila ne àmuludikèku too ne kùdi misùukà mijimine mu mpangu ne mu bibeeba. Tudi tumutùma, mu Dìna dyà Yesù Kìlistò. Amen.

Nzambi àkubènèshè, Mwanèètù Martin. Ndààku mpindyewu, ne Mukalenge ikalè neebè.

<sup>39</sup> Mmu kiiipàcilà kàmwèkàmwè aku anyi? [Mwanèètù Richard Blair ùdi wàkula ne Mwanèètù Branham—Muf.] Richard ki dìnà dyèbè anyi? [“Cyà bushùwà. Richard Blair.”] Mbanganyi bàdi bamanyè Richard Blair? Mbanganyi bàdi bìitabuuja ne yèyè mmusadidi wa Nzambi? Mmufùmìne ku—ku kasumbù kàà èglise Pentecôtiste Unie.

Nènku mwanèètù, Mwanèètù Blair, ndi mvùluka dibìikila dinène, dyèndè yèyè. Ndi mvùluka cikondo civwa Mwanèètù Blair kàyikù mufwanyine, kàyikù muswè kungiitabuuja mèmè to, bwalu kùvwa nyumà kampàndà ùkwàta nendè mudimu, ùmwambila ne mvwa wa mafi. Kàdi pàvwàye musòmbe ànu mu disangisha mene àmu, Nyumà Mwîmpè kukùdimuka kàdi kucyàmba patòoke. Nènku ùkaavwa ànu mwambè kupeta dì—dibùluka, ne aci ki cyàkamufikishà mu mùshindù awu.

Ne ndi mvùluka mukàjèndè mulenga awu mwàkambiikilayè dīngà ditùkù ku téléfònè. Yèyè ne: “Mwanèètù Branham, ndi ngeela meeji ne Richard ùdi ne lufù.” Nènku mukàjèndè awu, ngeela meeji, ùvwa ne citàmbalà cyà mu nshingù. Yèyè kuya kamutentekaci, mùmvwà mumwambile, ne kusambilayè. S’ki yèyè ewu.

<sup>40</sup> Mwânà mukesè wa mu dibòko ùvwa mupetakàne ne njiwù, anyi, [Mwanèètù Blair ùdi wàmba ne: “Mwanàanyi wa balùme.”—Muf.] mwanèndè wa balùme, mu njiwù, byenzè ne kabàcivwa kàbìdì ne ditèkemena bwèndè yèyè to, bwongò bwèndè bùvwa bunyungàkàne. Kàdi ku disambila, nànsha mùvwàdi ku tèlèfonè, mwànà awu kusàngajiiwaye.

Nudi nwitabuuja ne Mwanèètù Blair nntèmù mulelèlà wa Kilistò anyi? [Disangisha dìdi dyàmba ne: “Amen.”—Muf.] Sambilaayi bwà mabènesha ènu àmufile.

Bànà bèètù, mutentèkèlaayi byanza.

<sup>41</sup> Nzambì munanga, bwà kumanyisha mwanèètù wa balùme wa musàngeeleu ne ngiikàdìlù milenga ewu, musadidi Webè, udi mene muumùke ne mu cisumbù cyèndè sungasunga, bwà kwendela mu Bukènkè. Taatù, tudi tulòmba bwà Ûbèneshakù Mwanèètù Blair, patùdi tumutùma ne mabènesha ètù ne dimanyisha dyètù apa, ku dimutentekela dyètù dyà byanza, bwà kwònsò k’Ùdi mwà kumubiikidila aku, Mukalenge, bwà ku mudimu wònsò wùdi mwà kwikalakù awu. Swàku bwà Nyumà Webè àfile Mwanèètù Blair. Muleejèku njila ne muludikèku too ne kùdi bajimine ne bàdi bàpunga ne lufù bàà pa buloba ebu, bwà kwambulwishayè ku dipeta dyà mùkòkò mujimìne awu, bwà wàmòna mwà kuwàluja mu lupangu. Kwònsò kùdiwu mufwànyine kwikala, cyònsò cyùdi Wèwè naaci bwèndè yèyè aci, Mukalenge, tudi ànu tulòmba bwà Nyumà Webè àmuleejèku njila ne àmuludikèku mu lwendu lwònsò lwà mwoyi wèndè. Twètù tudi bànà bààbò. Mu dimupèeshà dyà cyaanza cyà buunyànà, tudi tulòmba bwà Ûmufileku, mu Dìna dyà Yesù Kilistò. Amen.

Cyanza cyà buunyànà! Nzambì àkubènèshè, Mwanèètù Blair. Twètù tudi neebè, lukàmà pa lukàmà, tukusambidila ne netwènzè cyònsò citùdiku mwà kwenza aci bwà kukukwàcisha mu lwendu amu. Nzambì àkubènèshè.

<sup>42</sup> [Mwanèètù Merlin Anthon ùdi wàmba ne: “Mbyà mwomùmwè ne mèmè, Mwanèètù Branham, dinjidila.”—Muf.] Wamba ne? [“Dinjidila.”] Wèwè udi nganyi? [“Merlin Anthon.”] Merlin Anthon. [“Ndi mu èkèleeziyà.”] Penyi? [“Mu èkèleeziyà emu.”] Mu èkèleeziya. Kùdikù muntu mumanyè Mwanèètù Anthon anyi? Mmwenyi, bwànyì mèmè. [“Wa mu Armée du Salut. Udi mumvùluke anyi?”] Kaa, èyowà’s. Mfwilèku luse, mwanèètù.

Ngwa mu Armée du Salut, ncyà bushùwà, ngààmuvùluku. Bushùwà, ngààmumanyi mpindyewu. Ndi ànu. . . Mpàla wèndè kàvwa ùmwèka wa muntu ùndì mumanyè dībà adi mene to, pa dībà edi. Mbanganyi bàdi bamumanyè bu mulùme wa Nzambì? [Disangisha dìdi dyàmba ne: “Amen.”—Muf.] Mbanganyi bàdi biitabuuja ne—ne Nzambì ùdi munkaci mwà kukwàta nendè



Cincinnati, ndi ngeela mpatà, bwà ne muntu nànsha umwe ikalé mumumanyè. Ûdi wàmba ne ùvwa mu cisùmbù kampànda, ne cisùmbù aci cìvwa ciswè kujidila bakàji bu bambi. Kàvwa yéyè mwà kucitwàla to, ki kukèngelabi bwà àkosolokè naabò.

Mùshindù awu menemene ki wùngààkakòsolokà mèmè ne ba-Baptistes Missionnaires. Docteur Roy E. Davis, mbanganyì bàkaadiku bamuumvwè? Cyà bushùwà, nukàadi bamuumvwè, nwamònu's. Ûvwa muswè kujidila bakàji kampànda bu bayiishi, kàdi mèmè kwamba ne: "To, mukalenge. Mèmè bu mukùlù," mèmè kwamba ne, "Ncyèna mwà kwenza aci to, ne dimanya dyònsò. Cidi cibèngangana ne Diyì dyà Nzambi."

<sup>47</sup> Mèmè nciu mukumanyè to, Mwanèètù Carrell. Kàdi mwimànyìne pa bujaadiki bwèbè, ne Bulelèlà bùdi utwà nyama ku mikòlò abu. . . Twètù katwèna cilumbù ne bakàji abu to. Bòbò mbànà bèètù bàà bakàji. Twètù tudi babànangè. Kàdi tudi twitabuuja ne bàdi ne kààbò kaaba, ne bàdi ne cyà kushàalapù. Nwamònu anyì? Ne tudi twitabuuja ne bàdi munanga wa mulùme kampànda, mukwàcishi. Ne nànsha byà munyì. . . Tudi twela meeji ne bàdi dipà dyà ditàmbe bunène, pa kuumusha lupàndu, didiku Nzambi mupèeshe mulùme. Kàdi kèna ne mwaba mu cyambilu to, bilondèshile Diyì dyà Nzambi. Mwimànyìne pa cyòci aci, ne diitabuuja dyèbè kùdi Nzambi, tudi tukutentekela byanza, mu buunyànà, bwà kulwa kuya neetù.

Tùmutentèkèlaayaaku byanza.

<sup>48</sup> Taatù wetù wa mu Dyulu munanga! Nsongàalùmè ewu, ndikù ànu mwà kumanya mùdiye ùdyùmwa. Mmwediibwe pambèlu bwà Bulelèlà bwà cyà bushùwà. Bwà ne: "Muntu kààkwikala ne mwoyi ànu ku dyàmpà nkààyaadi to, kàdi ku Diyì dyònsò." Pa nànkù tudi tumutentekela byanza, tutèeka mabènèsha ètù pambidi pèndè. Swàku bwà Nyumà Webè àmulombòlè, àmuleejè njila, ne àmuludikè mu lwendu lwònsò lwà mu nsòbelu wèndè too ne kwònsò k'Ùdi mwà kumutùma aku, Mukalenge. Àmanyèku ne twètù tudi munkaci mwà kumusambidila, ne netwìkalè dikwàcisha kùdiye, ne netùmwtwè mpàndà piikalàye ànu ùtwa Bulelèlà nyama ku mikòlò. Enzàku nànkù, Mukalenge. Tudi tumutùma, mu Dinà dyà Yesù Kilistò. Amen.

Nzambi àkubènèshè, Mwanèètù Carrell.

Petà wèwè ànu byanza abi bikutentekela cyanàànà, byà bantu bashiilàngàne. Nwènù bònsò mwelàayi mwoyi ku cyanza wà buunyànà bwà cyòci aci.

<sup>49</sup> Mwanèètù Ruddell, ewu ewu, kacya kabàtukù banjì kumujidila mu èkèleeziyà emu byà bantu bònsò bamanyè to. Nudikù mwà. . . Mbanganyì bàdi bamanyè Mwanèètù Ruddell? [Disangisha didi dyàmba ne: "Amen."—Muf.] Twètù bònsò tudi bamumanyè. Mbanganyì bàdi bamanyè ne yéyè mmulùme wa Nzambi? ["Amen."]

Taatù wa mu Dyulu munanga, twètù bu bakùlù Bèèbè tudi tutentekela mwanèètù ewu byanza udi mupicile mu mâyi a ndòndò, a bitoci. Yèyè mmumòne mùkaadi disangisha dyèndè didishinda. Mmumòne mùkaadi bintu byònsò byenzèkènzèke, kàdi nànsha nànkù mmwitàbùùje. Nànsha mùvwà...?..Tudi tumutentekela byanza, ne tumusambuluji mabènesha ètù. Mulaabèku maanyi, Mukalenge, mu mùshindù wà bukolè, ne Dìyi, Mukalenge, ne mutùmè ku kaamutanta kònsò kàà buloba!...?..udi mwà kwikala pambidi pèndè ne kumwambulwisha. Ne mutùmèku, mu Dîna dyà Yesù Kilistò. Amen.

<sup>50</sup> Mwanèètù Ruddell, udi misangu yònsò ànu ne cyanza cikwolwela cyà buunyàna. Mémè ntu mumanyè Mwanèètù Ruddell. Ùdi ùmwèka bu—bu mwanàanyi wa balùme sungasunga. Papa wendè ne mémè, ne mamwèndè, tutu bamanyàngàne kùkaadi ntàntà mule. Ne mémè ntu mumanyè ne Mwanèètù Ruddell mmusadidi wa Nzambi. Nkààdikù mukwàtèkwàte mudimu pàmwè nendè. Nzambi àkubènèshè, Mwanèètù Ruddell.

<sup>51</sup> Dyèndè nganyi? Wèwè udi nganyi, mwanèètù wa balùme? [Muntu kampànda ùdi wàmba ne: “Bukwendè bwà Mwanèètù Martin.”—Muf.] Mwanèètù Martin, udi mumumanyè anyi, Mwanèètù Martin?

Dîna dyèbè nganyi? [Mwanèètù wa balùme awu ùdi wàmba ne: “Révérend McComas.”—Muf.] Mwanèètù McComas. Ngeela meeji ne kakwèna muntu nànsha umwe kaaba aka udi mumumanyè to, kàdi yèyè ùdi...Èyowà, muntu ewu kaaba aka mmumumanyè, Mwanèètù Tyler. Ne mmulwè bwà kwikala...bwà kumutentekelabò byanza, bwà yèyè kwikala mwambudi wa Èvànjeeliyò. Mwanèètù McComas, utu wa penyi, Mwanèètù McComas? [“Rockford, mu Illinois.”] Rockford, mu Illinois. [“Wèwè’s uvwa mubùikile kumbèlù kwanyi, lumingu lushààle, anyi dilòòlò dyà mu òmwè dishààle, wèwè kusambidila mukàjàanyi.”] Kaa, ncyà bushùwà anyi? Bàà ku Tucson. [“Tucson, mu Arizona.”] Kaa, ngävùluku dibùikila adi mpindyewu. [“Kujuukayè kuulu dînda dyà pàakacyàbu.”] Mukalengè àtumbè!

[Mwanèètù Martin ùdi wàmabila Mwanèètù Branham cintu kampànda—Muf.] Wamba nè? [“Mwakunyaanyi wa bakàji wa mùkalà.”] Mwanèènù wa bakàji. [“Ùdi kaaba aka mpindyewu. Ùvwa mucibùkile panshi.”] Nànkù, ùdi kaaba aka mpindyewu, tuvwa bamusambidile, dilòòlò adi, twètù ku Tucson, ku tèlefonè. [“Mucibùkile panshi.”] Mucibùkil-... [“Ùvwa mucibùkile panshi, kàdi ùdi kaaba aka mpindyewu.”] Kùkaadi malòòlò ndambù, ùvwa mucibùkile panshi, kàdi ùdi kaaba aka mpindyewu. Mwanèètù Martin mmucimanyè, mulundà wanyi. Kabyèna bikèmesha to mùdiye muswè bwà kwangata Mukenji!

Tütentekelàayi mwanèètù byanza.

<sup>52</sup> Nzambi munanga, mémè, pàmwè ne bakwàbò aba, tudi tutentekela musadidi Webè ewu byanza, ne tumwela mwoyi ku cyanza wà buunyàna, tulòmba bwà mabènesha a Nzambi ìkalè...?..cyùdì Wèwè mulongòlòle bwà kwikalayè aci. Dibènesha Dyèbè ùikalè pambidi pèndè, nènku ùmuleejè njila ne ùmuludikè, mu Dîna dyà Yesù Kilistò. Amen.

Mwoyi wà ku cyanza wà buunyàna, mwanèètù wanyì, ne byòbì abi bìikalè neebè. Nzambi ìkalè neebè.

<sup>53</sup> [Muntu kampàndà ùdi wàmba ne: “Mwanèètù Branham?”—Muf.] Yè, mwanèètù? [“Ndi ne mukwàbò kàbìdì udi muswè pèndè cyòcì eci.”] Èyo, mukalenge. Ngeela meeji ne ewu ki... [“Mwanèètù Darris.”] Mwanèètù Darris. Ncyèna... [“Mémè ndi mumanyè Mwanèètù Earl ne Mwanèètù Brewer.”] Ewu muntu yèyè m’Mwanèètù Darris. Udi wa penyì, mwanèètù? [“Black Rock, mu Arkansas.”] Black Rock, mu Arkansas. Mwanèètù... [“Ndi mumumanyè, mwanèètù.”]... bamumanyè. Muntu mukwàbo, ngeela meeji, mwab’ewu, ùvwa wàmba ne... Mwanèètù Brewer. Ngeela meeji ne ndi mutwilàngàna naabò, mu dîndà emu. Ne—ne Mwanèètù wa bakàjì Vayle, ngeela meeji, Mwanèètù wa balùme Vayle, ne bònsò bàdì bamumanyè abu, ne bamanyè ne yèyè mmulùme wa Nzambi, musadidi wa Nzambi. Bilenga be!

<sup>54</sup> Èè, mpindyewu, mwanèètù wa balùme munanga, bwà kwikala mwambudi wa Mukenji, tudi baswè bwà ùmanyè ne netwikalè bakutwè paanyimà, netwènzè cyònsò citùdì pèètù mwà kwenza aci. Netùkusambìdilè, bwà wikalè pèèbè mwambudi wa Mukenji ewu too ne ku bitùpà byà kuleekùle byà kwònsò kùdì Nzambi mulongòlòle bwà wèwè kuya aku.

Tütentekelàayaaku Mwanèètù Darris byanza.

Nzambi munanga, nyewù tutentekela mwanèètù wa balùme byanza, tumwela mwoyi wà ku cyanza wa buunyàna, ne tumutùma mu Dîna dyà Yesù Kilistò, bwà Wèwè kumulaaba maanyi. Nènku...?..tumwela mwoyi ku cyanza wà buunyàna!...?.. Nènku Nyumà Webè àmufilèku, ne àmuleejè njila ne àmuludikè, mu Dîna dyà Yesù Kilistò. Amen.

Nzambi àkubènèshè, mwanèètù.

<sup>55</sup> Mpindyewu, ngeela meeji, Mwanèètù Anthony. Bààbùngì bàà kunùdì mbamanyè Mwanèètù Anthony. Ùdi neetù kaaba aka kùkaadi ntàntà mule. Mémè ntu mumanyè ne yèyè mmusadidi wa Kilistò, mémè mwinè. Ndi ngiitabuuja ne nnsongàalùmè mudilàmbùle. Kacya kabàtukù banjì kumutentekela byanza byà bantu bònsò bamanyè to. Kàvwa mumanyè ne eci necyènzèkè to, balundà bàanyi. Nwamònu anyi? Kàdì mpindyewu mene mbìmpè ànu mùdì dikwàbò díbà kanà dyònsò. Nànku netütentekelàayi Mwanèètù Anthony byanza ne kumwela ànu mwoyi ku cyanza wà buunyàna cyanàana. Nzambi ngudi ne cyà kwenza dijidila.

Eci cìdi ànu bwà kumumanyisha yéyè, ne kunùmanyisha nwênù ne, tudi twitabuuja mwanèètù ewu ne tudi bamunangè, ne yéyè ngumwe wetù, mu Mukenji. Nènku tudi baswè bwà ìkalè ne mabènesha a Nzambì, nènku citùdi tumulòmbela ncyôci aci. Tùsambilàayi, patùdi tutentekela mwanèètù byanza apa.

<sup>56</sup> Nzambì munanga, musadidi Webè mukesè, wa cyena Italie ewu, Mukalenge, mmulwè dilòlò edi, bwà—bwà bàmutentèkèlè byanza, ne cyanza cyà mwoyi wà buunyànà byà bantu bònsò bamanyè ncimwolwela, cyà kùdi èkèleziyà ewu. Mukalenge, Bukolè Bwèbè bunène bütumèku nsongàalùmè wa citende ewu ku citùpà cyà buloba ne kaamutanta kùdi Wèwè mumbiikile aku. Nènku swàku bwà àyè kasùngila bantu abu ku mpèkaatù ne ku mabèèdì, ne bwà kuKukwàcila mudimu, Mukalenge, matùkù èndè ònsò a mwoyi. Swàku Ùmulombòlè, ùmuleejè njila. Swàku bwà mabènesha ètu ìkalè nendè, patùdi tumutùma apa, mu Dìna dyà Yesù Kilistò. Amen.

Nzambì àkubènèshè.

<sup>57</sup> [Muntu kampàndà ùdi wàkula ne Mwanèètù Branham—Muf.] Huh? Kaa, ncyèna mumanyè to. Tudi ku nshinga ku tèlefonè; meeyà makùmi àtaanu ku kasunsa. Kùvwa muntu mukwàbò kaaba aka uvwa muswè. . .

Bàndaayi kùneeku nùditèèjè, ne nudi banganyì, nwênù bàna bèètù, ànu lwà ku cikòlokolo *eku*. Bàmblaayi ànu cyanàànà. [Mwanèètù ne mwanèètù yònsò ùdi wàmba dìnà dyèndè: “Pat Tyler,” “Claude Boggess,” “Dale Potter,” “. . .? . . . Henasey,” “James Humes,” “Earl Horner.”—Muf.] Ki bóbò abu anyi? [Muntu kampàdà ùdi wàmba ne: “Èyowà.”] Bàna bèètù.

Nwênù bantu aba, nudi nwitabuuja ne Mukenji ewu wùdi Bulelèlè bwà mu Dìyì dyà Nzambì anyi? [Bànà bèètù abu bàdi bàmba ne: “Amen.”—Muf.] Nudi nwitabuuja nànkù ne mwoyi wènù wònsò anyi? [“Amen.”] Èyo. Ne nudi nujinga nànkù, ne nwela meeji ne twètù banütentèkèlè byanza. . . Tudi baswè nùmanyè ne tudi neenù, ne netwènzè cyònsò citùdiku mwà kwenza bwà kunùkwàcisha.

Nènku mpindyewu ndi muswè bwà nwênù bàna bèètù, bwà mmonè mwà kubàtentekela pààbò byanza, bwà bàbandè buludì kùneeku mpindyewu. Nènku twinyikàayi bònsò mitù, patùdi tubàtentekela byanza apa.

Nzambì munanga, cisùmbù cyà bantu ncyôci eci. Ndi ntentekela yònsò wa kùdìbo byanza, mu Dìna dyà Yesù Kilistò, Mwànà wa Nzambì. Nènku swàku, Wèwè Udi mubàbiikile bwà kwikalabò bambi awu, bwà bààmòna mwà kuciyiisha, Mukalenge, matùkù àbò ònsò a mwoyi, nènku. . .? . . .kuyiisha cifùkiìbwà cyònsò Èvànjeelìyò. Tudi tubèèla mwoyi ku cyanza wà buunyànà, ne tulòmba bwà mabènesha Èbè ìkalè naabò, Mukalenge, patùdi tubàbènesha, tutùma mabènesha ètu apa. Swàku bwà cìyè ku kaamutanta kònsò kàà buloba kÙdi



mubàbìikidile bwà kuyabò aku. Swàku bwà bènzè mudimu ne bàKusadilè mu dikumbanyina dyùdi Wèwè mubàbìikidile adi. Swàku bwà bìikalè basadidi bàà bukitù ne balelèlà bàà Nzambì. Enzàku nàнку, Mukalenge. Nènku tudi tulòmba nùнку mu Dìna dyà Yesù Kilistò.

<sup>58</sup> Nzambì ànùbènèshè, muntu ne muntu, bânà bèètù. Nzambì àkubènèshè. Nzambì àkubènèshè, mwanèètù. Nzambì àkubènèshè. Nzambì àkubènèshè, Mwanèètù Humes. Mukalenge ìkalèku neenù, muntu ne muntu.

Mwonjì wùdi wùwikakajà myoyi yètù  
Mu dinanga dyà bwena Kilistò  
wùbeneshiibwè;  
Bwobùmwè bwà meeji a buuwetù  
Mbufwànàngàne ne bwà ku Dyulu.

<sup>59</sup> Yèyè kî mmulenga wa dikèma anyi? Anji elàayibi meeji mpindyewu ne, mbambi búngì kaayi bàdi mwab'ewu dilòòlò edi bwà kubàtentekelabò byanza!

<sup>60</sup> Ncìvwa mumanyè ne tuvwa balungè tèlèfonè ewu to. Bu bantu bàdi pambèlu pààpa mwà kumfwilakù luse bwà ciinè aci; ncìvwa mumanyè ne mmuvwàbi to. Nwamònu anyi? Ncìvwa ànu mumanyè ne bàvwa mwà kulunga kaaDiyiisha kakesè aka ku tèlèfonè dilòòlò edi to. Kàdi tudi. . .

<sup>61</sup> Mpindyewu netùbalè Dìyì túsambilè, ne túbwelè buludì mu Diyiisha edi dìndì ngumvwa ne Nyumà Mwímpè mmuswè bwà mèmè kunùtwàdila dilòòlò edi.

<sup>62</sup> Nènku mpindyewu patùcidì tubuulula mu. . .bwà cyena-bwalu apa, nènçimanyishè mu katancì emu. Tùbuululàayi mu Nombà, nshapità wa 22, mvensà wa 31. Nombà 22.31, bwà cyena-bwalu. Panùcidì nwenda nubuulula apu, nwènù baswè kubala, nùcìbalàayi anyi nwènzèpu kaacimanyinu.

<sup>63</sup> Ndi muswè nùmvùlùkèku nwènù bònso mpindyewu, too ne pàngaàlwà kunùmòna cyàkàbidi, mündi ntèkemena, misangu mikwàbò mu movù wà luuyà ewu, bu Mukalenge mwà kwanyisha. Kàdi cintu cyòci cyenzèke, ncìyi mufikè ku diya dyàmwàmwà dyà mbù to, nèngààlukilè. Kàdi tudi mpindyewu twitabuujà ne, bilondèshile mùdi byònso ebi byenzèke, Nyumà Mwímpè neàtùtùmè mpindyewu mu mùshindù wùdiYe musungùle Yèyè mwinè bwà kutùtùma awu. Nènku mùshindù awu ki wutùdi baswè kucyènza. Mukalenge àbeneshèku!

<sup>64</sup> Taatù, nyewù tukàadi twamba kubala Dìyì Dyèbè. Swàku bwà Wèwè kuDibènesha ne kuDilaaba ne kuDilaaba ku cyumvwilu cyètù, tudi tulòmba mu Dìna dyà Yesù Kilistò. Amen.

<sup>65</sup> Mukàndà wà Nombà, nshapità wa 22 ku mvensà wa 31.

Nènku MUKALENGE wàkatàbaja mèsù a Baalàmà, ne wàkamòna mwanjèlò wa MUKALENGE mwimàne mu njila, ne mwelè wèndè wà mwità mu cianza mupàtula mu

*cimànga; yèyè wàkiinamija mutù, ne wàkapòna mutwè mpàla panshi.*

<sup>66</sup> Mpindyewu, mu kubala kwà cyòcì eci, bwà kwibakilapù dyumvwija, ndi muswè kwangata cyena-bwalu eci ne: *Kacya Nzambi Ùtukù Ùshintulula Mmwènenenu Wendè Pa Bìdì Bìtàngilà Dìyì Dyèndè Anyì?*

<sup>67</sup> Aci's ncyena-bwalu ànu cyètù cyà bushùwà eci, ne cidi m'Bulelèlà bunène bùvwà bùkèngela twètù kuumvwa. Nzambi ùdikù mwà kwamba cintu kampànda kàdi pashiishe kwamba ne: "Mfwilaayikù luse bwà pàNdi mucyàmbè" anyì? Nzambi ùdikù mwà kuumusha Dìyì Dyèndè, paanyimà pàà Yèyè mumanè kuDyàmba anyì?

<sup>68</sup> Mpindyewu, mu dìyì edi mwaba ewu, cìndì mèmè musungwile dìyì edi, cìvwa mbwalu ndimwè dyà ku mèyì a mu Bible àdì mubadi, ùteeta bwà kumòna, anyì ùteeta kwamba ne Nzambi ùtu ùshintulula mmwènenenu Wendè; eci ncifwànyine kutàmba kwikala bu ne Yèyè wàkashintulula mmwènenenu Wendè kupita mu mwaba kanà wònsò mu Bible, wùndiku mumanyè, bwalu Yèyè wàkambila Baalàmà cintu kampànda ne pashiishe kumwambila cikwàbò. Nènku mpindyewu, bantu bààbùngì bàkaadi bateetè kuvwija Baalàmà ku diikala ànu, kaa, mwena mikendi anyì cintu kampànda. Kadi Baalàmà kàvwa mwena mikendi to. Ùvwa mupròfetà wa Mukalenge.

<sup>69</sup> Mpindyewu, netwànji kwenza mu mùshindù kampànda dizòlà dyà Dìyiisha edi, dyàmbedi. Izàlèèlà ùvwa mu lwendu lwèndè ùfùmina ku Pàlès-...mutàngile ku Pàlèstinà, ùfùmina ku Èjiipitù. Nènku Mukalenge ùvwa naabò, ne bàvwa... Mwena lukunà yònsò uvwa ujuuka kumpàlà kwà Izàlèèlà ùvwa ùmushiibwa mu njila, bwalu Nzambi uvwa mwambè ne neÀtumè mantètèmbwe kumpàlà kwàbò ne neipatè mwena lukunà awu, pàvwàbò ànu bènda mu ditùmikila dyà dìyì Dyèndè ditùma. Mudimu kawùvwa mutàmbètàmbe bunène to. Beena Amàlèkà, bantu baleebàlè bàà mfyondo bàà ditùkù adi abu, kabàvwa bènda bwalu kùdì Izàlèèlà to. Nànsha mùvwàbò bòbò tuubantu twà twìpì amu, kàdi bàvwa bènda mu EMU MMÜDÌ MUKALENGÈ WÀMBA. Pa nàнку nànsha dikàndameena diikàle dyà bishi, Nzambi ùvwa misangu yònsò ànu ùtábaleela Mèyì Èndè a mulayì awu bwà kaàpangidi bwà Izàlèèlà to.

<sup>70</sup> Ne Izàlèèlà wa Dipungila Dikùlukulu ncifwànyikijilu cyà Mukàji-musèla wa Dipungila Dipyadìpyà, udi upàtuka mu—mu maalu a pa buloba awu, wènda mu njila mutàngile ku Kaanàànà, anyì Kaanàànà kutùyaayà aku, Bukalenge bwà bidimu cinunu.

<sup>71</sup> Mpindyewu, mpindyewu, tudi tumòna ne Moàbà mwab'ewu ncifwànyikijilu cyà èkèleeziyà. Ne Moàbà... Bàvwa bashebèye ànu ndambù wa bamfùmù ne bayiishè mwena lukunà bimpàmbàmba, bashebèye byònsò, bakwàte buloba, ne baseemène pabwìpì ne Moàbà. Mpindyewu, nànsha byà munyi

Moàbà kàvwakù ditùngà dyà bampàngaanù to. Moàbà ùvwa nditùngà divwà dikwàcila Nzambì umwèumwè mudimu uvwa Izalèlèlà ùkwàcila mudimu awu. Ne buloba bwà Moàbà ku cibangidilu bwàkabanga ne mwànà wa balùme wa Lotà, mulela ne mwanèndè wa bakàjì sungasunga. Nènku yèyè, mwikàle mwashi wa ditùnga edi, ne mulongòlòle bantu bèndè bàà bamanyike bikolè abu ne bikwàbò, ne kwenzayè ditùngà dinène kubangila ku cyôci aci, ki bôbò kuvulangana ne kutùngunukabò.

<sup>72</sup> Nènku, mpindyewu, Izalèlèlà ùvwa wa ku dimiinu dyà Abraham, kàyì wa ku Lotà to. Izalèlèlà ùvwa mupàtùkile mu Izàkà, Yakobo. Nènku Izalèlèlà wàkajuukila ku bisàmbà dikùmi ne bibidì byà Yakòbò abi, wàkabiikidiibwa pashiishe ne “Izalèlèlà” awu, bwalu wàkalwangana mvità yà bibulà ne Mukalenge. Nènku Moàbà mwab’ewu. . .

<sup>73</sup> Mpindyewu, mu cyôci eci, ne nwènù bàdì ku—ku maatèlèfonè, ndi muswè kwanji kwamba ne ncyèna—ncyèna njinga kudyulangana to, ne ndi ntèkemena ne kí ncìngènzà to. Kàdì, Mukenji wudì mumpèèsha, ndi ne cyà kwikala ne lulamatu ku Mukenji awu, pàtupù nèngiikalè mwena lubombo. Nwamònu anyi? Ncyèna—ncyèna mwà kwamba cìngà cintu to ànu cìndi mutùmiibwe bwà kwamba.

Nènku ndi—ndi ngeela meeji ne mwena lukunà munène wa beena Kilistò leelù ewu ng’èkèleeziyà milongolola. Mémè ndi ngiitabuuja ne mwoyi wànyì wònsò ne ndekeelu wa byònsò necikadyènzè cimanyinu cyà nyama wa lwonji, cìndi mwà, ngeela meeji ne ndi mwà kujaadikila aci ku Bible ne dikwàcìsha dyà Nzambì. Nkàadi mumanè kuciijaadika. Ne, necidyènzè cimanyinu cyà nyama wa lwonji, nsangilu wa maèkèleeziyà. Bwalu, kacypù Nzambì kàtukù, nànsha mu cikondo kaayi, mwitàbè èkèleeziyà mulongolola, èkèleeziyà mudyènzè bulongolodi to, kacya. Kacya Yèyè kàtukù mucyènzè to.

Ne musangu wònsò wùvwà ànu muntu wènza bulongolodi, Nyumà wa Nzambì ùvwa ùbùshiyà ne kàvwakù wàlukila kàbidì to. Konkàayi mulongi kanà yònsò wa maalu-malonda, anyi wèwè mwìnè udi mwà kwikala mubadi. Kacypù! Pàvwàbò bàdyènza bulongolodi, Nzambì ùvwa ùbùtèeka mu citàmbà, ne ki mùvwàbu bùya; bùvwa bùshààlamù, kubangila ànu apu. Bàvwa bàvulangana mu bùngì bwà bidimba, kàdì kakùyiku ditàbuluja dyà Nyumà to; kacya, cyà kàbidì nkwadi.

<sup>74</sup> Moàbà, mwab’ewu, ncifwànyikijilu cyà byà nànkù awu, bwalu bàvwa ditùngà di—dilongolola; mu buloba bwàbò sungasunga, byènzè bu mu dìngumba dyàbò. Nènku bàvwa ne ntèndeleele yàbò yà sungasunga, ne wabò ntèndeleele ùvwa umwèumwè ùvwa nendè Izalèlèlà awu. Bàvwa beena Moàbà ne

biitabùuje Yehowàh Nzambi, kàdi bôbô bàvwa kasumbù kàà bantu kadilongòlòle.

<sup>75</sup> Nènku, mpindyewu, bu mùdìbo bàleeja èkèleeziyà wa mu mubidi, Izalèlèlà ùdi ùleeja èkèleeziyà wa nyumà mu lwendu lwèndè. Mpindyewu, Izalèlèlà kàvwa ditungà didilongòlòle to. Bu mùvwàbo bàlonda Nzambi, bàvwa badikàdile. Kufikabò mwaba kampànda, bapici bàà njila, kabàyi ne mwaba wà kuya. Kwònsò kùvwà Dikunji dyà Kapyà dìya aku, bàvwa bàya naaDi. Kabàvwa ditungà didilongòlòle to. Bàvwa ne ndongolwelu kampànda munkaci mwàbo, bwalu ditengudiibwa divwa dibàpèsha aci ku dìyi ditumà kùdi Nzambi, kàdi kabàyikù ditungà didilongòlòle mu cikondo eci to. Ndekeelu wa byònsò pààkalwàbo ditungà didilongòlòle, ki pààkadishindàbo ne kubèngabò Maasiyà wabò.

<sup>76</sup> Nènku mpindyewu, misangu yònsò, tуди tusangana ne, nyumà yà èkèleeziyà ne malongolodi a mubidi ne a nyumà eyi, pàvwàyi yitwilangana, kùdi misangu yònsò ànu dikumakana. Kacya kabitukù bipangile bwà kwikala nàнку to. Bitu misangu yònsò ànu byènza dikumakana. Bwalu, tуди tusangana ne mwòmò amu mùdi mukàwù. Nènku mwaba awu, mu mukàwù ewu, bìdi bitwàla mafwànyikija, matentula a mu musunya. Nènku tуди tubìpeta leelù ewu, ànu mwàkadìbi musangu awu amu. Pàdì Nzambi wènza cintu kampànda bwà muntu nkààyà, muntu yònsò ùdi ùteeta kutentula ànu mwàkenzelà Nzambi mwìnè muntu awu amu. Nwamònu's, cidi cilela ditembangana, ne cifila maalu a musunya. Ne pashìishe bôbò, lukwàbò luseke alu, kabàyi mwà kupeta bipeta byà nyumà to, dìbà adi bàdi bàcyàngacila ku bukòlè bwà cidìdì, anyì bàdi bàpingajapù cintu kampànda cikwàbò, bwà kubìndulula meeji a bantu, bwà kukòkela bayiidi paanyimà pààbò bôbò.

<sup>77</sup> Ki cyôci aci menemene cyàkenzekà ku cibangidilu mene; mùvwà Kaayinà ne Abèlè, bàna bàà balùme bònsò babidi abu pa buloba apa. Nènku pààkalàmbulà Abèlè Nzambi mulàmbù mwìmpè mutàmbe wà Kaayinà, ne Nzambi kushindika Abèlè, pa kutùluka ne kwakidila mulàmbù wèndè awu, cyàkajuula mukàwù kùdi Kaayinà, bwalu yéyè wàkuumvwila mwanààbò mukàwù, ne wàkashebeya mwanààbò awu.

<sup>78</sup> Cyàkabanga ku cibangidilu ne, pàvwà cyà mubidi ne cyà nyumà. . . Kàdi pààbi Kaayina ne Abèlè biikàle bàkuukwila Nzambi umwèumwè awu, bònsò bàbidi bààkiibaka byoshelu byà mùshindù wùmwè, ne bònsò babidi bàvwa bàkuukwila Nzambi umwèumwè awu, ku èkèleeziyà umwe, cyoshelu cimwè. Kàdi Kaayinà, ku dilukakaja dyà lungènyi dyà musunya, wàkatwàla bimuma byà mu buloba ne wàkabiteèka pa cyoshelu bu mulàmbù, wèla meeji ne ncyà bushùwà ne ncìvwà cifwànyine kufila dyandamuna kùdi Nzambi bwà difuta dyà cibawu. Pa nàнку yéyè ùvwa ne cyà kwikala mutwàle, mùdi bantu bàdyàmbidila leelù ewu ne, “bimuma byà pommes byàkangata

Adàmà ne Evà abi, ki byàkakèbà mpèkaatù.” Nènku, nànsha ciikàle cinyi, ndi ngeela meeji mpindyewu ne mbakuupùke naaci ku “kamuma kàà grenade” anyi cintu kampànda mpindyewu. Bàmwe bàà kùdìbo mbambè, àbìdì àdì panshì aa ne, cìvwa ncintu kampànda cikwàbò.

<sup>79</sup> Nènku, kàdi Abèlè ùvwa ne mulàmbù mujaalàme. Ùvwa mumanyè ne mashi ngàakacyènzà, ki kutwàlayè mwànà wa mùkòòkò. Nènku pààkaakidilà Nzambi wèndè yèyè awu, mpindyewu, Abèlè, ku diitabuuja, ku dibuulula, kakùyi ku mùshindù mukwàbò to. Kakùvwakù Bible mufùnda to. Pa nànkù, nudi numòna’s, cibangidilu cyà bwakàne m’Bulelèlà bwà Nzambi bubuulula, ne Èkèleeziyà mujimà wa Nzambi udi ne mwoyi mmwibakila pa cyòci aci.

<sup>80</sup> Yesù, dîngà ditùkù, ùmuka ku mukunà, wàkambila bayiidi Bèndè ne: “Bantu bàdi bàmba ne Mèmè Mwànà wa muntu ndi Nganyi?”

“Umwe mmwambè ne Wèwè udi Mòsà ne mukwàbò ùdi wàmba ne Udi Eliyà ne Udi Yelèmiyà, anyi umwe wa ku baprófeta.”

Yèyè kwamba ne: “Kàdi nwènù nudi nwamba ne Ndi nganyi?”

<sup>81</sup> Dìbà adi ki mùpostòlò Peetèlò, musonsola kùdi Nzambi, mufùulula kùdi Nyumà, kwambayè dìyi dilenga dyà dikèma adi ne: “Wèwè udi Kilistò, Mwànà wa Nzambi udi ne mwoyi.”

<sup>82</sup> Mònaayi dìyi adi. “Udi mubènèshìibwe, Simonà, mwànà wa Yona, kî mmusunya ne mashi bìdì bikubuulwile eci to. Taatù Wanyi wa mu Dyulu ngudi mukubuulwileci. Wèwè udi Simonà. Pa lubwebwe elu. . .”

Lubwebwe kaayi alu? Mpindyewu, mwena Kàtòlikè ùdi wàmba ne: “Mpa Peetèlò, dibwe, kaadibwe kakesè aku.” Ne mwena Mishòònyì ùdi wàmba ne: “Mpa Kilistò, Lubwebwe.”

Kabiyi bwà kupanganangana to; kàdi pàvwa mpa dibuulula dyàkapetà Peetèlò adi ne, Yèyè ùvwa Nganyi. “Muntu nànsha umwe kèna mwà kulwa k’Ùndi,” mwàkambà Yesù, “pàdì Taatù Wanyi kàyi mumukòke to. Ne bònsò bàdi Taatù muMpèèshe nebàlwe k’Ùndi.”

“Wèwè udi Kilistò, Mwànà wa Nzambi udi ne mwoyi.”

<sup>83</sup> “Udi mubènèshìibwe, Simonà, mwànà wa Yona; kî mmusunya ne mashi bìdì bikubuulwile eci to, kàdi n’Taatù Wanyi udi mu Dyulu. Pa lubwebwe elu Nèngiibakilèpu Èkèleeziyà Wanyi, ne biibi byà ìfernò kabyèna mwà kumutàmbe bukolè to.” Dìyi dyà Nzambi dibuulula’s!

<sup>84</sup> Mònaayi, Abèlè, ku diitabuuja kùdi Nzambi, wàkalàmbula mulàmbù mwìmpè mutàmbe. Kàdi mwena kwitabuuja wa musunya awu wàkeela yèyè meeji ne cìvwa mmidimu yà byanza byèndè yèyè mwìnè, abi nànkù, ne bimuma byèndè ne mulàmbù

wèndè mulenga wùvwàye mutwàle awu, bivwà Nzambi mwà kwanyisha, kàdi ki kwenzabi dikùmakana's.

Tudi tusangana ne Abraham ne Lotà bavwa ne cyà kukùmakana.

<sup>85</sup> Tudi tusangana ne Mòsà ne—ne Daatànà, Koolà, bàkenza dikùmakana dimwèdimwè adi.

Mòsà, mwikàle mupròfetà mulongolola mwikàle ne Dìyì dyà Mukalenge, mushindikiibwe ne yéyè nguvwa musungula bwà kwikalayè mulombodi wabò wa díbà adi, ne Abraham ùkaavwa mulayè bintu byònsò ebi, nènku ki Mòsà ewu wènza ànu menemene civwà Nzambi mwambè ne ki civwà mwà kwikalakù, ne ki civwà mwà kwenzeka aci.

Kàdi Koolà, mwikàle wa musunya, wàkaswà bwà kajuula bulongolodi munkaci mwàbò. Wàkaswà bwà kwenza cisumbù kampàndà cyà bantu. Kàdi Nzambi kàtu ùkwàta mudimu ne bantu mùshindù awu to. Bidi bileeja mwaba awu mene, mu Mifundù, cifwànyikijilu cyà lwendu leelù ewu ne, bulongolodi kì ncìdì Nzambi mulongòlòle nànsha. Bwalu, Koolà mmwenzè ànu ùcyènza, kwambilayè Mòsà ne: “Wèwè wadimònu pèèbè be.” Mu ngaakwilù mukwàbò ne: “Disangisha dijimà ndyà cijila! Mòna's, wèwè udi wamba ne ànu wèwè ki muntu wa cijila umwèpelè. Kwèna ne bukenji bwà kwenza cintu bu nàнку nànsha. Udi uteeta kudyènza wèwè mwinè muntu wa munène. Twètù bònsò tudi bàà cijila. Tudi bònsò bàà bàà Nzambi.”

<sup>86</sup> Ki Mòsà kukùdimunayè ànu mutù e kuumuka kuya. Kwambayè ne: “Mukalenge, nèngènzè cinyi?”

<sup>87</sup> Nzambi kwambaYè ne: “Tàpulukà nendè. Bikaadi bìNtondè.” Ki Yèyè kumumina mu buloba.

<sup>88</sup> Nwamònu's, kwàkenzeka dikùmakana. Pàdi cyà musunya ne cyà nyumà bitwilangana, kùtu misangu yònsò ànu dikùmakana. Pààkatwilanganà Yudààsà ne Yesù, kwàkenzeka dikùmakana: Umwe, Mwànà wa Nzambi; mukwàbò, mwànà wa Sàtaanà. Ànu mwàkadì Kaayinà ne Abèlè, kwàkenzeka dikùmakana pààkatwilanganàbo. Umwe wa kùdibo ùvwa mulami wa cibùcilu cyà èkèleeziyà, ne mukwàbò Awu mpaasàtà. Nènku mùdibi mpindyewu, tudi balwè mu ditùkù edi, ku cintu cimwècimwè aci kàbidi. Dìngumba dyà musunya difwànyikija ne Mukàji-musèla wa nyumà wa Kìlistò. Mukàji-musèla wa nyumà wa Kìlistò mmushiiàngàne bikolè ne malongolodi a musunya, mu mùshindù wà ne kakwènakù cyà difwànyikija munkaci mwàbi to nànsha kakesè.

<sup>89</sup> Mpindyewu mònaayi, cyà mu bufùki citu misangu yònsò ànu citeeta kwikala cifwànyikijilu cyà cyà nyumà. Kàdi, bu mwàkadìbi mu Yakòbò ne Esawù, kabyàkukùmbanakù to. Kì mbifwànyine kukùmbanakù to. Mpindyewu, pààkafikàbi ku dyenza dyà byenzi bimpè, ndi—ndi mèmè ngeela meeji ne Esawù mu bushùwà bwà bwalu nguvwa muntu mwímpe

kutàmba Yakòbò, ku mèsu kwà bantu. Ûvwa ùteeta bwà kutàbaleela tatwèndè; yèyè ùvwa mpofo, mupròfetà. Ne bintu byònsò bivwàye ùteeta bwà kwenza ebi, kàdi nànsha nàнку Esawù kàvwakù wèla meeji ne cyôci aci cìvwa ànu cyenzedi cyà musunya to. Wàkeela meeji ne ùvwa mwà kubwela ku cìvwàye mwenzè, kwenzela muntu kampànda cintu kampànda cìmpè, bivwa ànu bìmpè. Kàdi Yakòbò yèyè, musùukà wèndè mujimà wùvwa mbwà kupeta bwanààbutè abu, ne ki cìvwà Nzambì wànyisha ne ki cyà nyumà mu yèyè ncyôci aci.

<sup>90</sup> Mònaayi, ne bikaadi misangu yònsò ànu bifikishe wa mubidi ku dikina wa nyumà. Cyàkafikisha Kaayinà ku dikina Abèlè. Cyàkafikisha Koolà ku dikina Mòsà. Cyàkafikisha Yudaàsà ku dikina Yesù. Ki mùyaayàbi ànu nàнку ànu nàнку. Cìtu cìfikisha wa mubidi ku dikina wa nyumà, ànu mwàkadìbi ku cibangidilu ne Kaayinà wàkakina Abèlè amu, mwena mulàmbù wàkaakidilàbo kùdi Nzambì awu, kàdi ùteeta bwà kubinyangakaja's.

Bàdi bàteeta mene ne bwà kunyangilangana luumù. Bàdi bàteeta bwà kunyanga byònsò, bwalu cidi ànu mmukàwù wètù ewu's. Byàkabangila mu Kaayinà ne byàkajaadikiibwa ne cìvwa mmukàwù, ne cìcidi ànu cintu cìmwècìmwè aci leelù ewu pàdi cyà mubidi (cyà musunya) ne cyà nyumà bitwilangana. Cidi cijaadika ne n'Sàtaanà, kakùyì mùshindù mukwàbò to, bwalu mukàwù wùdi wùfùmina kùdi Sàtaanà. Ne pashìishe cidi cilela ditentula dyà Bulelèlè, muntu ùteeta kutentula cintu kampànda cidiye kàyì to, cidiye kàyì mulongòlòle bwà kwenza to. Búngì bwinè bwà byòbi abi bitùkaadi bamònèmòne mu matùkù a ndekeelu aa's wè! Kaa, ekèlekèle, búngì bwinè bwà byòbi abi's wè!

<sup>91</sup> Pa nàнку tudi tumòna ne Nzambì ùtu wènza bwà kashid- . . . bwà kashidi kàyikù ùshintulula mmwènenù Wendè pa bìdi bitàngilà Dìyì Dyèndè dyà ku cibangidilu to. Kàdi, ewu udiYè bìikila, ki udiYè ùlongolola. Mukwàbò nànsha umwe kèna mwà kwangatakù kaaba aku to. Muntu nànsha umwe kàvwakù mwà kwangata kaaba kàà Mòsà to. Nànsha kujuukè ba-Koolà búngì munyi, ne nànsha ba-Daatànà búngì munyi; ùvwa m'Mòsà, uvwa Nzambì mubiikile, nànsha nàнку.

<sup>92</sup> Kàdi, ne bantu bòbò kabàyì baswè kwenda mu diswa Dyèndè dipwàngànè to, Yèyè ùdi bulelèlè ne diswa dyà cimfulààmwòyì dyàkulekelàYe wendelamù. Mònaayi, Yèyè ùdi ùcyànyishila, èyo, kàdi Yèyè neenzè bwà kukwàtaci mudimu bwà butumbì Bwèndè, mu diswa Dyèndè dipwàngànè. Mpindyewu wèwè muswè. . .

<sup>93</sup> Mbyenzè ànu bu, ku cibangidilu aku, kacìvwa diswa dipwàngànè dyà Nzambì bwà bàna kulediibwabò pa buloba ku disangila dyà mulùmè ne mukàjì to. To, mukalenge. Nzambì wàkafùka muntu ku lupwishi lwa buloba, kwelaYè mupùùyà wà mwoyi munda mwèndè, ne kulwayè musùukà wùdi ne mwoyi.

KupàtulaYè mu muntu awu mukwàcishi, ne kumwenzelaYè mukàji. Ki cìvwa diswa dyà kumpàlà ne dyà ku cibangidilu dyà Nzambì ndyòdì adi. Kàdi pààkabwelà mpèkaatù ne kwenzayè cintu cyàkenzàye aci, dìbà adi Yèyè kwanyishila mulùme bwà kusèlayè mukàji, bilondèshile mikenji, ne bwà kulelayè nendè bânà. “Nùvulanganè ne nùjè buloba, dìbà adi, pìikalàbi ne awu ki mùshindù wunwikalà mwà kucyènza.” Kàdi, nudi numòna’s, kacìvwakù diswa Dyèndè dipwàngàne to.

<sup>94</sup> Ki bwà cinyì, bintu byònsò bìvwà ne mbangilu ebi bìdi ne cyà kwikala ne ndekeelu. Bikèngela bwà mpèkaatù yònsò àfikè ku dibùtudiibwa. Bikèngela bwà mpèkaatù yònsò ùmushiibwè. Ki bwà cinyì, mu Bukalenge bunènè bwà bidimu cinunu pààlwà dibìikà dyà ku lufù, kabyàkukèngela bwà twètù kulediibwa cyàkàbìdì kùdì baataatù ne baamaamù bèètù to, kàdi Nzambì ànu mwàkenzàYè ku cibangidilu amu neàbiikidilè muntu ku lupwishi lwà buloba, ne mukwàcishi wendè pàmwè nendè. Ncyà bushùwà. Ki mùshindù wàkacyènzàYè ku cibangidilu ngwawù.

<sup>95</sup> Nènku ki bwà cinyì, kacya Nzambì kàtu ùshintululakù mmwènenù Wendè pa bìdì bìtàngilà nì ncinyì cyònsò to, kàdi Yèyè neàkwanyishilè bwà ùtungunukè. Mpindyewu, ewu nnjila mule wa ngenda nyùnguluka bwà kufika ku cìndi muswè kwamba kaaba aka pa bwalu ebu. Kàdi, nènku, kàdi, bìdi ne, newikalè. . . Ndi muswè bwà nùcyùmwè. Nwamònu anyì? Nzambì neàkwanyishilè bwà wèwè kwenza cintu kampànda, ne mene kukubènesha mu dicyènza amu, kàdi cìbì kaciyi diswa Dyèndè dipwàngàne to.

<sup>96</sup> Nzambì wàkaanyishila Izalèlèlà bwà kwangatayè mikenji, mu Ekèsòòdè nshapitá wa 19. Pààbì ngàsà ùkaavwa mumanè kubàpèèsha mupròfetà, Dikunji dyà Kapyà, mwànà wa mùkòòkò wa mulàmbù, bukolè bwà disùngidiibwa, kàdi bòbò bààkela mbilà mikolè bálòmba Mikenji. Kacìvwa diswa dyà Nzambì to, kàdi cyàkafunyikiibwamù bwalu muntu ùvwa ùcikèba. Kàdi wàkeediibwa mulawu ànu kùdì mikenji miinè yàkakèbàye ayi.

<sup>97</sup> Mbitàmbe bwìmpè bwà kwikala ne diswa dyà Nzambì. Ki cìdiYe mutùlongèshe. “Diswa Dyèbè dyènzekè. Bukalenge Bwèbè bùlwe. Diswa Dyèbè dyènzekè.” Tudi ne cyà kudilekelela ku diswa Dyèndè ne ku Dìyì Dyèndè. KùCyèdiku mpatà to. Cìtábùùjè. Kùteeci kukèba njila wa kuCìcinguluka to. Cyàngàtè wèwè ànu mùdìCi awu.

Bààbùngì menemene mbaswè kunyùnguluka, kupeta mukwàbò njila kampànda. Kàdi paùdì wenza nàнку awu apu, udi udisangana mwikàle utùngunuka, udi usangana ne Nzambì ùdì ùkubènesha, kàdi udi wenzela mudimu mu diswa Dyèndè dyà cimfulààmwòyì kàdi kabìyi mu diswa Dyèndè dipwàngàne, diswa dyà Nzambì to.

<sup>98</sup> Yèyè ùdì ùcyànyishila, mùngàmbi amu, kàdi Yèyè—Yèyè kààkulekelakù ciikàle diswa Dyèndè dipwàngàne to; kàdi



Yèyè neenzè bwà kukwàtaci mudimu bwà kutwà mushinga ne kubènesha diswa Dyèndè dipwàngàne. Nènku dilela dyà bàna, ku disangila dyà mulùme ne mukàji, ncimwè cyà ku byòbi abi.

<sup>99</sup> Mpindyewu mònaayi, Moàbà, ànu kwìnè kwònsò aku, ùvwa ditungà dyà mu masandi. Dyàkabanga, dyà mu masandi, pààbi's kùdi taatù mwena—mwena kwitabuuja ne mwanèndè wa bakàji mwena kwitabuuja.

Ànu menemene, bu nwènù mwà kwangata aci bu cifwànyikijilu ne kukwàta mudimu ne meeji a nyumà, nudi mwà kumòna dngumba adi diimàne mwaba awu bitòòke tòò ànu mùdi cintu kanà cyònsò eci. Bushùwà. Nwamònu's, cintu cyònsò mu kaabujimà's ncibi ànu menemene. Nènku, tàngilàayi, pàdici citwàdiibwa, cibangè mùshindù awu, kacyenakù. . . Cìdi citùngunuka, mùdi dibùlù dyà nêjè, didi ditùngunuka ànu ne kutàmba kubùnguluka ne kubùnguluka ne kubùnguluka. Udi wenza cilèmà cìmwèpelè, ne ubangila pa cilèmà cìmwèpelè aci, ne ubanga kubùnguluja cintu cìmwèpelè paanyimà pàà cikwàbò, ne cintu cìmwèpelè cifwànàngàne ne cikwàbò, byònsò paanyimà pàà cikwàbò.

<sup>100</sup> Nènku mùshindù awu ki wàkabangà èkèleeziyà. Ki mùshindù wàkabangàye ku Nicée, Loomò, pàvwà èkèleeziyà wa Kàtòlikè wa cyena Loomò. . . Ku ntwàdijilu menemene, kwàkafùminàye aku, ùvwa m'Mpenta. Kàdi pààkadyènzàbo bulongolodi ne kubwejabò bantu bàà bamanyike bikolè apu, mu èkèleeziyà, bààkabanga kwenza, kwenza masambila, ne kubala lùnzàadi, ne—ne kusambidila bafwè, ne bintu bikwàbò byònsò ebi. Ki pashìshe kubangayè kubùnguluka, ùmuka ku cilèmà cìmwè ùya ku cikwàbò, ku cilèmà ne ku cikwàbò, too ne munùdi mwà kutàngila kùkaadiye muyè aku. Kamwènaku cifwànyikijilu nànsha cimwe cyà mpenta muntwamu to, nànsha kakesè. Nwamònu anyi? Ncilèmà cìmwèpelè cyàmbula cikwàbò, cyàmbula cikwàbò. Kùdi cintu ànu cìmwèpelè cyà djenja, ncyà ne, kukùpula byònsò bikaadiku abi kàdi kwalukila ku cibangidilu.

<sup>101</sup> Pààkabangà Martin Luther ne dibingishiibwa. . . Ewu's bìvwa bikèngela kwikalayè èkèleeziyà wa ba-Luthériens, muyè cipòòlò. Nwamònu anyi? Pùikalàbi ne. . . Luther, pààkadìvwijàye bulongolodi, kàvwakù mwà kwangata dijidiibwa dyà Wesley to, bwalu wàkadìvwija bulongolodi; ne bantu kabàvwakù mwà kucitwàla to, ki Nyumà kupàtuka muntwamu.

<sup>102</sup> Mpindyewu, kasumbù kàà Lotà aka; anyi, Moàbà ùvwa mwànà wa mwànà wa bakàji wa Lotà mulela mu masandi, cyà kumpalà. Mpindyewu mònaayi, bu èkèleeziyà wa mu mubidi ewu, Moàbà, ùdi ùleeja dngumba dyà mu mubidi.

Izàlèlèlè ùdi ùleeja Èkèleeziyà wa nyumà. Izàlèlèlè, kùvwa èkèleeziyà mulelèlè, uvwa mukàji-musèla wa ditùkù adi,

mubiikila bwà kupàtuka mu Èjiipitù, ne mushindikiiibwe ne nguvwa bulelèlà.

<sup>103</sup> Mònaayi pàvwàbo, bàbìdì abu pààkatwilanganàbo. Bònsò bàbìdì bààkalàmbula mulàmbù wà mwomùmwe, bònsò bààkiibaka, bààkamòna byoshelu mwandamutekète, bònsò bààkalàmbula mulàmbù mukezùke, ngombe. Ne bààkalàmbula mene ne bimpàngà byà mikòòkò, bàfìla bujaadiki bwà ne kùvwa Maasiyà uvwa ne cyà kulwa. Bilondèshile mùvwà maalu ne cyà kwikala, bònsò bàbìdì bàvwa menemene ànu bàà mwomùmwe. Izàlèlèlà, mwinshì mu cibandabanda emu; Moàbà, kuulu ku kakùnà aku. Nènku Moàbà mwikàlè ne byoshelu mwandamutekète; Izàlèlèlà ne byoshelu mwandamutekète. Moàbà ne ngombe mwandamutekète; Izàlèlèlà ne ngombe mwandamutekète. Moàbà ne bimpàngà byà mikòòkò mwandamutekète, byàkula bwà Maasiyà uvwa ne cyà kulwa; Izàlèlèlà ne bimpàngà byà mikòòkò mwandamutekète.

Dishiiilangana divwa cinyi munkaci mwàbò? Bilondèshile mùvwà maalu ne cyà kwikala, bònsò bàbìdì mu bulelèlà. Kàdì, nudi numòna's, Moàba kabàvwa ne dishindika dyà Nzambì to; bàvwa ànu ditungà cyanààna, kasùmbù kàà bantu bàà bamanyike bikolè. Kàdì Izàlèlèlà bàvwa ne mupròfètà. Bàvwa ne Lubwebwe lutuuta. Bàvwa ne Dikunji dyà Kapyà. Bàvwa ne nyòka wa cyamù cyà kabanda, bwà dyondoppiibwa. Bàvwa ne mabènesha a Nzambì miikale ènda naabò, ne bòbò mbàvwa bàna bàà Nzambì babiikila bwà kupàtuka.

<sup>104</sup> Mpindyewu tudi tusangana aci mu cifwànyikijilu cyà menemene mu èkèleeziyà yà leelù ewu ayi. Bwà yèyè, Moàbà awu, kabìvwa nàнку to. Izàlèlèlà ùvwa mupìci wa njiila, ùmuka ku mwaba ùya ku mukwàbò; kwònsò kùvwa Dikunji dyà Kapyà adi ditentemuka, bàvwa bàtentemuka naaDi. Bwà Moàbà yèyè, kabìvwa nàнку to; bàvwa bòbò bavwàngàle mu dinguumba dyàbò sungasunga, mu ditungà dyàbò sungasunga. Kabàvwa bòbò bàtentemuka to, bàvwa basòmbèle ànu mwaba awu. Bàvwa ne bantu bààbò bàà bamanyike abu. Bàvwa bàtùma diyì bwà maalu kwenzekawù mùvwàbo ne cyà kwenza, ne bàvwa ne balwanganyi bààbò bàà mvità, bàvwa ne balwanganyi bààbò, bàvwa ne mfùmù wabò uvwabò nendè awu, kùvwàbo bàpetela mèyi matùma, ne bikwàbò byònsò.

<sup>105</sup> Kàdì Moàbà wàkamòna Izàlèlèlà mwikàle ne cintu kampàndà cìvwàbo bòbò kabàyi naaci to. Bààkamòna bukolè bunène munkaci mwà Izàlèlèlà, ne cìvwa mmupròfètà. Ne mupròfètà awu ùvwa m'Mòsà. Ne bàvwa bamanyè ne pàvwà mvità yìkola, bàvwa bàbàndisha ànu byanza byèndè muulu cyanààna ne bàbilama byela muulu amu, ne mvità yishintuluka. Kàdì bòbò kabàvwakù ne cyà nàнку to, ki kuteetabò bwà kucipàlakaja ne cidiiidi, ne bwenzeji bwà cidiiidi. Kutùmabò bantu mu dikwàbò ditungà bwà kwangatabò mupròfètà wa difutu bwà kulwayè mwabò amu, bwà bààmònakù mwà kwikala ne mupròfètà, ne kwikalabò ne

bukolè munkaci mwàbò ànu mùvwà naabù Izalèèlà munkaci mwàbò amu amu.

<sup>106</sup> Nudi numòna dipàlakaja dyà mu musunya adi anyi? Nudikù mwà kumòna èkèleeziyà wa musunya awu leelù ewu anyi? S'mmwenzè cintu ànu cyòci cimwècimwè aci.

<sup>107</sup> Mònaayi, mpindyewu, bònsò bàbìdi nebìikalè ne bapròfetà. Dishìilangana òvwa ànu ne, Mòsà, mupròfetà wa Nzambi awu, wendè Mfùmù òvwa n'Nzambi. Ki kùvwàye ùpetela èndè mèyi matùma, Díyi dyà Mukalenge. Ne Baalàmà, yèyè, ùvwa pèndè ne mfùmù, ne mfùmù awu òvwa m'Baalàkà, mfùmù wa Moàbà, ne ki kùvwàye ùpetela èndè mèyi matùma ne èndè mabènesha. Ki Moàbà kwambilayè Baalàkà ne: "Pwekà kùneeku," anyi Baalàmà's wè, kwambayè ne, "pwekà kùneeku ùngeelèlè cisàmbà eci mulawu, bwalu mbabwikile buloba bujimà. Bàdi bàlwa bàlaka ànu bintu byònsò mùdi ngombe ùlaka bisoosà amu." Yèyè ne: "Pwekà kùneeku mpindyewu. Ne ndi ngumvwa ne wèwè udi mwà kwela mulawu, udi mwà kubènesha, cyònsò cyùdi wèwè wenza cidi ciitabiibwa."

<sup>108</sup> Mpindyewu, tudi baswè kumòna ne muntu ewu òvwa mupròfetà mulongolola kùdi Nzambi, kàdi òvwa mupàanyiishe bwanàabutè bwèndè bwà tubingilà twà cidiidi. Ànu mùdi èkèleeziyà mwenzè leelù ewu, mùvwà Luther, Wesley, Mpenta, ne cisùmbù cyàbò cijimà, babùpàanyiishe ku bwenzeji mu bulongolodi bwàbò. Mòsà, ku bukòokeshi bwà Nzambi; Baalàmà, ku bukòokeshi bwà Baalàkà. Kàdi, bapròfetà bònsò bàbìdi abu bàvwa bantu babìikila kùdi Nzambi, ne bònsò bàbìdi bàà nyumà. Mònaayi dishìilangana. Yònsò wa kùdìbo òvwa ne mfùmù: wa Mòsà òvwa n'Nzambi, wa Baalàmà òvwa m'Baalàkà.

<sup>109</sup> Mònaayi mwab'ewu mùdi cyà nyumà cyangàciibwe, bwà kujaadika ne cyà mubidi ncyà mafi. Mòsà, mutùma kùdi Nzambi, mu njila wa mudimu, mmutwilangana nendè ne mwela kadyòmbò kùdi mukwàbò mupròfetà wa Nzambi. Nudikù mwà kudifwànyikijila aci anyi! Mòsà, mubiikila kùdi Nzambi, mulongolola kùdi Nzambi, mwimàne mu mudimu wà Nzambi; wàkabwela mu kasùmbù kàà mashikà, kàà maalù a kwisùkwisù aka, ne wàkeediibwa kadyòmbò kùdi mukwàbò mupròfetà wa Nzambi, civwà Nzambi mubènèshe ne mulongòlòle. Mmunyi mùdiku mufwànyine kumanya dishìilangana? Bùbìdi bwàbò bàvwa ne bapròfetà. Nzambi òvwa wàkula ne bapròfetà bònsò bàbìdi abu.

<sup>110</sup> Kàdi bàmwè bàà kùdìbo bàtu bàmba ne: "Nzambi mmwambè ne: 'Enzà *cikampànda*.' Nzambi mmwambè ne: 'Enzà *cikansanga*.'" Mpindyewu, ncyèna ngeela aci mpatà to, kàdi ncipàtùke mu njila wa Díyi dyà Nzambi. Mupròfetà awu, nànsha yèyè mwikàle mupròfetà, mmupàtùke mu njila. Bantu bùngì cyaànà bàtu bàseeswishibwa mùshindù awu. "Kaa, ewu

mwanèètù's ùdi mwà kwenza *cikampànda*, ne *ewu* mwanèètù's ùdi mwa kwenza *cikansanga*," kàdi kuvila Dìyì?

<sup>111</sup> “Nànsha mèmè ngaakula mu myakulu yà bantu ne yà banjèlo, nànsha mèmè ne mapà, mu mùshindù wà ne ndi mwà kutùntumuna mikùnà, nànsha mèmè mfla bintu byànyì byònsò bwà kudiisha bapèlè, ndi ànu cintu cyanààna.”

“Bààbùngì nebàlwe kùNdi mu ditùkù adi, bàmba ne: ‘Mukalenge, Mukalenge, ncyàkambakù bipròfetà mu Dìna Dyèbè anyì? Mèmè ewu, mu Dìna Dyèbè, ncyènàku mwipàte baadémons ne mwenzè byenzi byà bukolè anyì?’ Ne Mèmè nembàmbilè ne: ‘Nguumùkilaayi apa, nwènù... Nguumùkilaayi apa, nwènù beena mudimu bàà bubì. Kacya Ncitu munùmanyèku to.’” Kàdi pààbì, s’bàakalwa ne ditonda dyà ne mbacyènzè, kàdi Yesù wàkamba ne bàvwa beena mudimu bàà bubì. Bubì ncinyì? Ncintu cyùdi mumanye ne bìvwa bìkèngela wèwè kwenza, cìdì cìmpè bwà kwenza, kàdi kùyi ucyènza to. Nudi numòna cìikalàku mu matùkù a ndekeelu anyì?

<sup>112</sup> Umvwàyi mulongo mujimà awu! Cyòcì aci's ki cìvwa kiipàcìlà kàanyì dilòòlò edi. Mvwa mwambè ne nèmputukè pa dìbà citèemà, kàdi nèmputukè paanyimà kakesè, pàmwàpa. Tàngilàayi, ki cìvwa kiipàcìlà kàanyì mu kaabujimà, mbwà kunùleeja mulongo ewu, ku Dìyì dyà Nzambì, nwamònu's, bwà ne—bwà ne bìkèngela Nzambì àlamè Dìyì Dyèndè mu bulongàme bwà kushààla Yè Nzambì.

<sup>113</sup> Mpindyewu, tudi tumòna ne bònsò bàbìdì aba bàvwa bantu bàà nyumà, bònsò bàbìdì bàvwa bapròfetà, bònsò bàbìdì bàvwa babìikidiibwe. Nèku Mòsà, mu njila mene wa mudimu amu, mwikàle cyàkàbìdì ne Dikunji dyà Kapyà kumpàlà kwèndè ditùkù dyònsò, Nyumà wa Nzambì pambìdì pèndè, mu njila wa mudimu. Ki musadidi mukwàbò wa Nzambì ulwàlwa ewu, mubiikila kùdì Nzambì, mulongolola kùdì Nzambì, mupròfetà uvwa Dìyì dyà Nzambì dilwa kùdiye. Apa ki pàdì mushoonyi wà njìwù. Kakwèna muntu nànsha umwe mufwànyìnekù kwela mpatà ne muntu awu ùvwa wa kùdì Nzambì—wa kùdì Nzambì to, bwalu Bible mmwambè ne Nyumà wa Nzambì ùvwa wàkula nendè, ne yèyè ùvwa mupròfetà. Kàdi, nudi numòna's, pàakapètaye dyandamuna dilelèlà dyà kùdì Nzambì, yèyè kàakaswà ku Cìlama to. Kàaka Cìmòna to, pashìishe wàkaya bwà kwela Mòsà kadyòmbò.

<sup>114</sup> Mpindyewu, Baalàmà wàkakèba dìswa dyà Nzambì, ne mwoyi wèndè wònsò. Mpindyewu, pàakalwà bantu banène aba kwambabò ne: “Baalàmà! Mfùmù Baalàkà mmutùtùme, bwà wèwè kulwa kùdiye dyàkàmwè wèlè cisàmbà cyà Izalèlèlà eci mulawu, bwalu mbatangàlàke pa buloba bujimà, ne mpindyewu nyawù baasè citùùdilu bwà kundwisha. Ne mbanyangàkàje bukalenge ne bukalenge bwònsò mu nyùngulukilu mwònsò emu,

mu bukòokeshi bwàbò. Ne patùdi twakulangana apa tudi baswè bwà wèwè ùlwe wèlè cisàmbà eci mulawu. Bwalu, ndi ngumvwa ne wèwè mwelè muntu mulawu, yèyè mmwediiibwe mulawu.” Mpindyewu, nudi numòna’s, ùvwa mulùme wa Nzambi. “Cyùdi wèwè ubènesha aci, ncibènèshiiibwe.” Yèyè’s ùvwa musadidi wa Nzambi.

115 Ki mpindyewu Baalàmà kudyàmbidilayè, bu mùvwàye mupròfetà ne: “Kùdi cintu ànu cimwèpelè cidi cinkèngelà kwenza, nkukèba cidi diswa dyà Nzambi.”

116 Ki mudimu wà mupròfetà ngwòwò awu, piikalàbi ne mmubiikila bwà kwikala mupròfetà. Dyàmbedi, mupròfetà ùdi ne cyà kwenza cinyi? Nkukèba diswa, Dìyi dyà Nzambi. Ùdi ne cyà kwenza nàнку. Bwalu, bu mùdiye mupròfetà, Dìyi dyà Nzambi dilwalwa kùdiye. Kùdi. . . Bàdi bàmba ne: “Èè, wèwè kwèna mwena tèlòlòjì to.” Kacya Bible kàtukù wàmba ne Dìyi dyà Nzambi ditu dilwa kùdi mwena tèlòlòjì to. Bòbò’s ki bàdi bàDibwejakaja. Dìyi ditu dilwa kùdi mupròfetà wa Nzambi.

117 Kàdi ki muntu nyèyè ewu uvwa mupròfetà wa Nzambi. Ne pàakamwàngatàbo ku mudimu bwà difutu, bwà kwangaciibwa ku mudimu bwà difutu, bwà kulwayè kwela cisàmbà cikwàbò cyà Nzambi mulawu apu, mònaayi, yèyè’s wàkaya kakèba diswa dyà Nzambi. Ne yèyè ùvwa muswè kumanya diswa Dyèndè dipwàngàne, ne Nzambi wàkamupèèsha diswa Dyèndè dipwàngàne pa bwalu abu. Diswa Dyèndè dipwàngàne dyàkaleejiiibwa kùdiye. Diswa Dyèndè òvwa bìshi? “Kùyì to!” Kì Dìyi dyà kumpàlà dyà Nzambi ndyadì. “Kùyì naabò to. Kùteecikù kubùndula cisàmbà Cyànyi to, cidi cyènda mu njila Yànyi mipwàngàne aci.”

118 Mùshindù mwinè wùdìbi leelù ewu’s, mbaswè kukòkangana, kwenza miyiiikì yà dikòkangana, ne bikwàbò byònsò, pàdìbo bàmbà Nyumà wa Nzambi ùkwàta mudimu munkaci mwènù. Ne ki cidìbo bàteeta kwenza’s, bàdi batèeta kucyènza bidimu byònsò ebi, bwà kuCibwikidija mukana. Kàdi pàdìbo bàtàmba kuteeta kuCibwikidija mukana, ki pàdiCi citàmba kulwa cinène. Kwèna mwà kwelakù mulawu cidi Nzambi mubènèshe to. Kwènà ànu mwà kucyènza to. Kwènà ànu mwà kucyènzakù to.

119 Pa nàнку, nudi numòna’s, cívwa ncisàmbà cyà Nzambi. Mpindyewu, mupròfetà awu, nànsha mùvwàye kuntwaku ne mwàngàciibwe ku mudimu bwà difutu kùdi mfùmù awu, ùkwàta mudimu munkaci mwà bantu bàà bamanyike, ne bikwàbò. Kàdi Dìyi dyà Nzambi dyàkalwa kùdiye. Wàkakèba diswa dyà Nzambi, ne diswa dyà Nzambi dyàkamwandamuna, dyàmba ne: “Kwèdi cisàmbà eci mulawu nànsha. Mèmè ndi mubàbènèshe.”

120 Mpindyewu kakwènakù mwena tèlòlòjì mwinshì mwà mauulu udi mwà kuvila Mukenji wutùdi tuyiisha ewu ne, kaWèna ànu menemene Dìyi dya Nzambi pa dìbà menemene to. Nzambi mmushindikiibwe, mu byònsò bitù byambiibwe anyi

byenjiibwe, Yéyè ùtu muWùjaadike ne mmulelèlà. Mpindyewu, kakwènakù mwena tèòlòji, mubadi wa Bible, mupròfeta nànsha umwe, udikù mwà kutàngila mu Dìyì adi to, yéyè mwikàle mupròfeta, neàmonè cintu cimwècimwè aci. Kàdi yéyè kàyi ùmòna cintu cimwècimwè aci to, aci cidi cileeja ne kùdi cintu cipampalàmùke. Bwalu . . .

<sup>121</sup> Wèwè udi wamba ne: “Èè, kaa, mémè’s ndi mwà kucyàngata cyanza mwandamuna.” Ki mùvwà kàbìdì Baalàkà mufwànyine kwenza, Baalàmà. Nwamònu anyi? Kàdi Nzambi wàkashindika Mòsà.

Nènku díbà adi cileeji cívwa ncinyì? Dìyì dya Nzambi. Nènku yéyè wàkumvwa dipàngadika dya Nzambi ditòoke tòò, dishindàme adi ne: “Kùyì to. Kùteecikù bwà—bwà kwela mulawu cìndì Mémè mubènèshe nànsha. Bòbò abu ncisàmbà Cyànyì.”

Kàdi nudi bamanyè mùdi bwalu anyi? Baalàmà kàvwakù munangè bantu abu to, twamb’eku twamb’eku. Kaa, ncinyì . . . Búngì bwinè bwà ba-Baalàmà bàdìku pa buloba leelù ewu’s wè! Yéyè kàvwa munangèku kasùmbù aku to, cyà kumpalà.

<sup>122</sup> Mpindyewu, paanyimà pàà yéyè mumanè kupeta dipàngadika ditòoke tòò dya Nzambi adi ne: “Kùyì to,” kàdi, nudi numòna’s, pamutù pàà kwenza nàнку, cívwa cintu ànu cimwècimwè aci bu cyà Kaayinà, bu cyà Koolà ne, yéyè ùvwa ne mukàwù, ne ùvwa—ùvwa muswè, ùkèba kabingilà bwà kuyayè, nànsha bìshi.

<sup>123</sup> Mònaayi, ciimamwèndè wa bukalenge cyèndè cyà cyena màngumba aci, paanyimà pàà yéyè mumanè kupingaja dyandamuna adi, ne: “Bwàlà bwànyì, ncyèna ngeela meeji ne nènnye kuntwaku to. Ncyèna ngeela meeji nèngìikalè naabò bwalu to. Ncyàkwenza muyiiki wà dikòkangana ne bantu abu to, bwalu Nzambi nyawù ùkaadi mumanè kungambila ne bòbò abu ncisàmbà Cyèndè, nènku ncyèna ngeela meeji ne nènnye to.” Yéyè wikalapù nànsha mushààla ne cyòci aci’s!

Kàdi, munda mwà mwoyi wèndè, kàvwakù mubànangè to. Nwamònu anyi? Kabàvwa bàà mu cisùmbù cyèndè to. Nènku cyònsò cívwa kaciyi cyà mu cisùmbù cyèndè aci to, “kacívwa cijaalame to, twamb’eku twamb’eku.” Nwamònu anyi? Nènku kupwekeshayè mèsù e kubàtàngilayè, kwambayè ne: “Kùdi bintu kampànda bibi bìdì bantu aba benzè. Ncyà bushùwà ne Nzambi wa cijila neélè bantu bàà mùshindù wàwa mulawu. Bàdi—bàdi bantu bapangè mukàndà. Kì mbalongè kàlaasà bu twètù to. Twètù tudì cisàmbà cyà bantu batàmbe kwikala bàà meeji matwè. Kaa, bàdi bàlàka mukana bàmba mùdìbò bàkwàcila Nzambi mudimu, kàdi, anji bàtàngilè ùmonè, bàdi bìshi? Musùmbà wà, mòna’s, musùmbà wà bapika, basopi bàà bitoci, bàdi beena Èjiipitù biipàte kuntu kwàka. Mòna’s, Nzambi

kî mmufwànyinekù kwikala ne cyà dyenza ne musumbà wà manyaanù bu nàнку awu to!”

<sup>124</sup> Wàkapanga kumòna Lubwebwe lutuuta alu ne nyòka wa cyamù cyà kabanda awu, ne Dikunji dyà Kapyà adi. Wàkateeta bwà kubàcinkila ku mmwènenenu wa maalu a mu nsòmbelu. Wàkapanga kumòna dibiiikila ditùmbùkè dyà Nzambi. Ku ngàsà, ku disungula, nkùvwàbo mu njila awu, ne biikàle ne Dîyi dyà Nzambi. Kàdi pàkaavwàye ùkèba bwà kubèela mulawu, Nzambi kwambaYè ne: “Kucyènjì to. Mbàànyi Mémè. Bàlekèlè. Kùbàlengì nànsha.”

<sup>125</sup> Mpindyewu, ki muntu awu kukùdimuka, e kwalukilayè. Mpindyewu tàngilàayi ciimamwèndè wa bukalenge cyèndè cyà cyena-màngumba, nànsha nàнку, pàdiye wàlukila apu. Kutùmabò kasumbù kàà katàmbe kwikala ne bwenzeji. Ewu musangu bàvwa bafwànyine kwikala bàmwè, pamutù pàà ànu beena kwitabuuja bàà pàtupù aba, bàvwa bafwànyine kwikala ba-docteurs bàà bunzambi bàakalwà ewu musangu. Bàvwa bafwànyine kwikala bèèpiskòpò, anyì pàmwàpa bakùlù batàngidi bàà ditungà, bwà bònsò... Kutùmayè ka—ka—kasumbù kàà katàmbe bwìmpè, ne ka—kasumbù kiikàle ne bwenzeji butàmbidile ndambù, muntu kampànda uvwa mulongè kàlaasà katàmbidilekù ne mufwànyine kumwadijila ndongamu awu mùshindù mutàmbe bwìmpè, mufwànyine kucivwijakù cyà lungènyi.

<sup>126</sup> Nwamònu’s, s’ki cyàkenzà Kaayinà; wàkalukakaja lungènyi. Ki cyàkenzà Koolà; wàkalukakaja lungènyi. Kî ng’ewu udi ulukakaja lungènyi to.

“Tudi tutònkola dilukakaja dyà ngènyi.” Twètù tudi twitabuuja Nzambi, cidì nì ncinyì cikwàbò cyàmba nànsha ciikàle cinyì. Twètù tudi twitabuuja Nzambi. Katwèna tulukakaja lungènyi pa cidì Nzambi wàmba to. Kwèna mwà kulukakaja naaCì lungènyi to. Bikèngela ùCitàbè ku diitabuuja. Ne cintu kanà cyònsò cyùdi mumanyè, kabyèna bikèngela kàbidi kulukakaja lungènyi to. Mémè ncyèna mumanyè mùdiYè ùcyènza to; ndi mémè ànu ngiitabuuja ne Yèyè ngudi ucyènza. Ncyèna mumanyè mwàlamàYè mulayi awu to; kadi Yèyè mmwambè ne neÀwùlamè. Mémè ndi nciitabuuja. Ndi nciitabila pa bishimikidi byà ne ndi ngiitabuuja ne n’Dîyi dyà Nzambi.

Wèwè udi wamba ne: “Èè, kwèna mwà kwenza aci kùyi unyookiibwa to.” Ncyèna mumanyè mungààpangà kunyookiibwa bwà bwalu abu to, kàdi Yèyè mmwambè ne: “Cyàmbè.”

Ndi mvùluka ne mpaasàtà wanyì wa ba-Baptistes wàkangambila, wàmba ne: “Mòna’s, Billy, wèwè’s neùyiiishè makunji mu èkèleeziyà. Mòna’s, wèwè udi wela meeji ne muntu neàteelejè cintu bu nàнку awu anyi?”

Mémè ne: “Nzambi’s ngudi mwambè nàнку.”

“Neucyènzè bishi, ne kàlaasà kàà mwandamutekètè kaùdi mulongè aku, usambidila bamfùmù, ne uyiisha pa buloba bujima?”

<sup>127</sup> Mémè ne: “Ncyèna mumanyè ne nèngènzè bishi to, kàdi, Yèyè ngudi mwambè nàнку, nènku aci’s ncìmpè cikùmbàne bwànyì mémè.” Nwamònu anyi? “Yèyè ngudi mwambè nàнку. Ncyèna mumanyè mwènzekàbi to.”

Yèyè ne: “Udi wela meeji ne bantu pa buloba bunène ebu, balongè tùlaasà bawàyà kakùngamangana naabò abu, pa cyenabwalu eci cyà dyondopa dyà kùdi Nzambi ne bikwàbò, udi wela meeji ne bôbò nebàcitàbùùjè anyi?”

<sup>128</sup> Mémè ne: “Ki mbwalu bwànyì mémè bwà kumanya ne bàdi bàcìitabuujà anyi to.” Mémè ne: “Mudimu wànyì nkuCìyiisha. Ki cidiYe Yèyè mungabile. Yèyè mmwambè ne nelkalè naanyi, ne mMungabile ciikalàci mwà kwenza.”

Nènku ncyènzè menemene ànu cyàkambàYe ne ncyènzè aci. “Dyàmbedi, kubàkwàta ku byanza; pashìishe nebyènzèkè ne newikalè umanya too ne bwalu busokòmè bwà mu mwoyi wàbò.” Ki mémè kunwàmbilaci, nènku byàkenzeka mùshindù awu. Cidi cìbyènza bishi? Ncyèna ànu mumanyè mùdici cìbyènza to. Ki mbuntàngilekù mémè to bwà mùdibi byènzèke; mbyènzèke’s.

<sup>129</sup> Nganyi uvwakù mufwànyine kuumvwija pàvwà Nzambi mwabile Eliyà ne, “Bànda ùkasòmbè ku mukùnà kwàka, ne Mémè nènkuðiishè. Ndi mutùmìne bi—bikòlòlò diyì bwà kukuðiishabi” apu? Mmunyì mùvwàku cikòlòlò cyètù eci cìfwànyine kupeta cipese cyà dyàmpà ne katùpà—katùpà kàà mushipa, byosha, ne kubìtwàdila mupròfetà? Aci’s nciitàmbe kule ne kule byònsò bìndìku mémè ewu mufwànyine kuumvwija. Ncyèna ngeela meeji ne nànsha wèwè udi mwà kucyùmvwijakù to, anyi muntu kanà yònsò ewu. Kàdi Yèyè’s wàkacyènza. Ki cyònsò cìvwà ne musinga. Yèyè wàkacyènza, ne ki bulelèlè bwàci mbwòbù abu.

MwàkacyènzaYe, ncyèna mumanyè to; abu kì mbuntàngilekù to. Kàdi Yèyè wàkacyènza. Mùshindù wàkenzaYe buloba, ncyèna mumanyè to; kàdi’s Wàkabwènza’s. Mùshindù wàkatùmàYe Mwan’Èndè, ncyèna mumanyè to; kàdi’s Wàkacyènza. Mùshindù wàkabiikàYe ku bafwè, ncyèna mumanyè to; kàdi’s Wàkabiika. Yèyè wàkansùngila bishi? Ncyèna mumanyè to; kàdi’s Wàkansùngila. S’ncyà bushùwà. Yèyè wàkakusùngila bishi? Ncyèna mwà kukwambila to; kàdi’s Wàkakusùngila. Yèyè mmungondòpe bishi? Ncyèna mumanyè to; kàdi’s mMungondòpe. Yèyè wàkalaya ne neÀcyènzè, ne Yèyè ùtu ùshàala mukwàte ku Diyì Dyèndè.

Mpindyewu, s’bìvwa bikèngela bwà Baalàmà kwikalayè mumanyè ciinè aci, ne yèyè’s ùvwa mumanyè cìvwà cìmpè.

<sup>130</sup> Mònaayi, kasùmbù katàmbe bwìmpè, kàà bwenzeji aka, kulwakù, ne ncinyì citàmbe bwìmpè? Bàvwa ne matàpishi



matàmbe bwîmpè. Ne kacyi ànu aci to, bàvwa bafwànyine kumusàkidila mikwàbò mfrangà, ne bôbò biinè, bàvwa bààkamupèèsha mwanzù mutàmbe bwîmpè. “Mpindyewu, pamutù pàà kwikala ànu mwambi wa cyanaànà mu bulongolodi, netùkuvwijè mutàngidi wa distriki. Wamònu anyi? Aci, ne—netùkwenzèlè cintu kampànda bu wèwè mwà kwipata musumbà wa bantu awu mwaba awu, wamònu’s, ne kwimanyikakù cintu aci.” Kaa, kulayabò bwà kumupèèsha mwanzù munène. Yèyè ne: “Paùdi utàmba kubènesha . . .” Yèyè ne: “Udi mumanyè’s, mèmè ndi mwà kukubàndisha myânzù.” Tàngilàayi nùmonè kùdiye ùpetela èndè mèyi, kùdi mfùmù wa ditungà.

<sup>131</sup> Mòsà ùvwa ùpetela èndè Mèyi penyì? Kùdi Mfùmù wa Dyulu. Dimwè òvwa n’Dìyi dyà mulayi wà Nzambi ne: “Nènye neenù too ne ku buloba bulaya, ne muntu nànsha umwe kààkunùkàndameenakù to. Nèntumè mantètèmbwe kumpàlà kwènù ne mbìpàtè, ku dyàbalùmè ne ku dyàbakàji. Nènku nenwàngatè buloba abu. Ndi mulay-. . . Nkàadi mumanè kunùpèèshabù. Túngunukàayi, nubwàngatè, bùshaalè bwènù; mbwènù wnwènù.” Nènku mpindyewu, nwamònu’s, Yèyè awu ki uvwa Mòsà ùtèeleja. Ne muntu ewu wàkatèeleja too ne mwàkenzekàku cintu kampànda munda mwà mwoyi wèndè sungasunga cyàkapetelayè mukàwu, ki pashiishe kuyayè kùdi mfùmù wendè wa ntèndeleele. Nwamònu anyi?

<sup>132</sup> Mònaayi, mwanzù mutàmbe bwîmpè. Yèyè ne: “Udikù mumanyè ne mèmè ndi mwà kukubàndisha myânzù anyi? Nènkubàndishè nkupèèshè mwânzù mutàmbe bwîmpè. Nènkwenzèlè bitàmbe búngi. Nènkubàndishilè difutu. Nènkupèèshè difutu ditàmbe bwîmpè.” Nènku pààkamupèèshàye byònsò ebi, ki kumufomijabi.

<sup>133</sup> Mba-Baalàmà búngi kaayi bàdi pa buloba leelù ewu, bàdi ne, ku mwânzù mutàmbe bwîmpè, èkèleeziyà mutàmbe bwîmpè, mulayi wà cintu kampànda! Pàdi muntu ùtábajiiibwa mèsù ku Dìyi ne ku byenzedi byà Nzambi. . . Nènku muntu mwîmpè awu, udi ne bwenzeji awu, neàbangè bu musadidi wa Nzambi, ne ùlombola disangisha dímpè. Paanyimà pàà cikondo, bàdi bàmuleeja dibàtiiza dyà Nyumà Mwîmpè; bàmuleeja dibàtiiza mu Dìna dyà Yesù, cidì ciikàle Mufundù ne mùshindù wùmwèpelè wà mu Mifundù wà kubàtiiza. Kàdi pàdìbo bàmuleejaaci, ne òngumba dimanya ne nebàmujimijè pààbangàye cyòci aci, bàdi bàmupèèsha mwânzù mutàmbe bwîmpè ne dishintuluka mu èkèleeziyà. Nwamònu’s, cyena-Baalàmà cyà kale aci’s, cyàkàbidi, ànu menemene mwàkadibi ku cibangidilu amu.

<sup>134</sup> Mpindyewu, muntu udi ubala Bible awu awu, kèna mwà kuMubalakù to pàdiye kàyi ùmòna ne m’Bulelèlè. Kacya kakùtukù muntu nànsha umwe ukàadikù mubàtiize ne myânzù yà “Taatu, Mwànà, Nyumà Mwîmpè” to. Ntwitabàayi wa cyena-Katòlikè ne kí ndilongesha dyà Bible to. Muntu nànsha umwe

mu Bible ukàadikù mubàtìijùbwe, anyi bidimu nkàma yisàtù paanyimà pàà lufù lwà mùpostòlò wa ndekeelu, wàkabàtìijùbwa ànu mu Dìna dyà Yesù Kilistò. Èkèleeziyà wa Kàtòlikè ngwàkabanga aci, ne mikwàbò yònsò kuupukakù. Ne mwambi kanà yònsò udi musòmbe mu birò byèndè mutàngile aci, mmumanyè ne m'Bulelèlè, kàdi, bwà dimanyika, bwà kulama mwânzù wèndè, mwelela meeji matàmbe bwímpè munkaci mwà bantu abu, ùdi ùdya cibàngà.

“Èè,” mùdi wèwè wamba, “Nzambi’s mmumubènèshe.”

<sup>135</sup> Cyà bushùwà’s, bàmwè bàà kùdibo bàdi ne mapà a dyondopa, bàmwè bàà kùdibo bàdi bènza tùmpanyè tunène. Ne bulèlèlè bubàtàngile mwisù, nènku bàdi bàpeta dyandamuna òmùwèdìmwè dyà ku Dìyi dyà Nzambi dyùdi wèwè anyi muntu mukwàbò kanà yònsò ewu mufwànyine kupeta adi; Nzambi kàtu ùshintuluka to. Nudi bumvwè cìndì muswè kwamba aci anyi?

<sup>136</sup> Baalàmà, bwà mwânzù mutàmbe bwímpè, kwelayè meeji. Mpindyewu tàngilàayi, pàakaalukilà kasùmbù kàà katàmbe bwímpè aku, cidi cijaalàme . . . Baalàmà, kaaba aka, wàkangata mufundù wà mafi. Nwamònu anyi? Kwambayè . . . Ka—kasùmbù kàà katàmbe bwímpè aku kwalukilakù, s’bìvwa bìkèngela kwikalayè—kwikalayè mwambè ne: “Ngumùkilaayi mwab’ewu! S’ngànwàmbidi Dìyi dyà Nzambi. Kàtukàayi apa! Eci ng’EMU MMÙDÌ MUKALENGE WÀMBA.” Kàdi, nudi numòna’s, matàpishi awu, ne kwikala muntu mutàmbe kumanyika!

<sup>137</sup> Kaa, mùshindù mwinè wùtùbo baswè kucyènza’s wè! “Netùkutùmè pa buloba bujimà. Netùkupèèshè ndèkè wa pabwèndè. Netùkutùùdìlè mfrangà bwà masangisha èbè a myaba yònsò bu wèwè ànu mwà . . .” Kaa, to. Uh-huh. Nwamònu anyi?

Tudi bamanyè cidi Dìyi dyàmba. Tudi bamanyè cidi Nzambi mwambè. Netùshaalè ne cyòci aci, ku dikwàcisha dyà Nzambi. Nwamònu anyi? Nànsha ciikàle mulayi wà mùshindù kaayi, ne bùngì kaayi bwà mfrangà mikwàbò yùdi mwà kufuta, ne nànsha *bikampànda*, *bikansanga*, anyi *bikankènga* bùngì munyi byùdi mwà—byùdi mwà kupàtula; tudi baswè EMU MMÙDÌ MUKALENGE WÀMBA, ne cikaadiYe mwambè *Emu* dyàmbedi.

“Èè, èkèleeziyà mmwambè ne: ‘Aci ncyà cilondèle.’”

Citùdi baswè cyàkambà Nzambi ku cibangidilu aci. “Ne cyònsò cidi cisàkidilaKù anyi cyumushilaKù, dìna dyèbè mene nedyùmushiibwè ku Mukànda wà Mwoyi; bwà kusàkidilaKù dìyi òmwè, anyi kuumushilaKù Dìyi òmwè.” Citùdi baswè ncidiYe mwambè; kî ncidi èkèleeziyà mwambè, cidi Docteur Jones mwambè, cidi muntu kampànda mukwàbò mwambè to. Tudi baswè cidi EMU MMÙDÌ MUKALENGE WÀMBA mwambè, cidi Dìyi dyambè.

<sup>138</sup> Kàdi mpindyewu tudi tusangana Baalàmà, musadidi wa Nzambi. Nènku bààbùngì bàà ku bantu abu bàdi bàbanga, ne

biikàle balongolola kùdì Nzambì, ne bàmba cyà bushùwà Dìyi dyà Nzambì mu bintu byàbùngi; kàdi pàkaadibi bikafika ku Bulelèlè mu kaabujimà, kabàyi baswè kucyènza to.

<sup>139</sup> Mònaayi mwab'ewu, bu mupròfeta wa Nzambì, kabìvwa bikèngela kwikalayè mukwàcìbwe mu cisumbù cyà bwena aci to, twamb'eku twamb'eku. Kabìvwa bikèngela bwà kwikalayè muyè naabò nànsha. Kàdi, tàngilàayi, bwà bwalu bwà dimanyika, nwamònu's, bwà bwalu bwà kondò kèndè kàà mwoyi, wàkamba ne: "Èè, anjì shààlaayi bufùkù bujimà ebu, nènku nènganjibi kuteeta cyàkàbìdì." Nwamònu's: "Nènganjibi kuteeta cyàkàbìdì"? Cyùdì muswè kuteetela cyàkàbìdì ki cinyi?

<sup>140</sup> Nzambì's ùkaavwa mumanè kumwambila cyà kwamba. Nzambì's ùvwa mwambè ne: "Bàmbilè ne kwàkuya to." S'ki Dìyi Dyèndè dyà ku cibangidilu adi. "Ncyàkuya to. 'Ne kùyi to. Kwèdi mulawu cìndi Mèmè mubènèshe to.'" Mpindyewu tàngilàayi nùmonè mwàkamukùdimukilàci, paanyimà pàà katanci. Nwamònu anyi? Ne necikudimukilanganè, dìbà dyònsò. Pàdi Nzambì wàmba cintu kampànda, ki cidìYe muswè kwamba. Kàtu ùshintulula mmwènenenu Wendè pa bwalu abu to. Ùtu ùshààla ànu ne Dìyi Dyèndè. Cìdi ní nganyi mukwàbo wàmba nànsha ciikàle cinyi, Yèyè ùdi ùshààla ànu ne Dìyi adi.

<sup>141</sup> Mpindyewu, s'bìvwa bikèngela bwà Baalàmà kwikalayè mumanyè cidì cimpè. Bìvwa bikèngela kwikalayè mutùukàkàne ne balundà bàà mùshindù awu abu. Kàdi màtàpishì ónsò malenga awu ne mulari wà mfùmù ewu awu, mwambè ne: "S'udi mumanye ne mèmè ndi mwà kucyènza. Mèmè's ki mwèpiskòpò. Mèmè ndi ànu mwà kwenza cyònsò cìndi muswè kwenza aci, nènku nènku bándishè myànzu bu wèwè mwà kulwa kucìngenzela."

Pàabì Nzambì's ùkaavwa mumwambile ne: "Kùcyènjì."

<sup>142</sup> Kàdi Baalàmà kwambayè ne: "Nwènù, shààlaayi bufùkù bujimà, nènku nènganjibi—nènganjibi kuteeta cyàkàbìdì."

Nwamònu's, yèyè's ùvwa ne Dìyi. Kabyèna bikèngela ùkokanganè kàbìdì pa Cyòci to. Nzambì ùkaadi mumanè kwamba nànkù. Ne kasumbù kàà mùshindù awu, bàdi misangu yònsò ku dyakula dyàbò bàkupàtula mu diswa dyà Nzambì, wèwè mubàshìile cyalu.

<sup>143</sup> Kùvwa kasumbù kampànda kàakalwà kùdì mupròfeta, musangu kampànda, dyèndè Yobò. Kabààkapeta mwà kumupàtwisha ku muyiiki wàbò awu to. Yèyè wàkamòna cikèenà-kumòna. Ùvwa mumanyè civwà cijaalàme.

Baalàmà wàkamòna cikèenà-kumòna, kàdi kààkashààla ànu naaCì to.

<sup>144</sup> Nànsha mùvwà bisumbù byà èkèleeziyà wendè byambè ne: "Kaa, Yobò, bìvwa bikèngela wèwè kwenza *cikampànda*, bìvwa bikèngela wèwè kwenza *cikansanga*" amu. Nànsha

mukàjèndè mwinè, kwambayè ne: “Wèwè’s udi wakula bu muntu mukùtākàne.” Nwamònu anyi? “Mémè’s ndi mumanyè cìdì Mukalenge mwambè. S’ndi mumanyè cìdìYe mulòmbe, ne cyòci aci’s ki cìndi mwenzè.” Nwamònu’s, yèyè wàkashàala ne cìvwà Nzambi mumwambile.

<sup>145</sup> Mònaayi, Baalàmà kukwàta mudimu ne mufùndù wà mafi ewu bwà kondò kèndè kàà mwoyi. Nwamònu anyi? Kwambayè ne: “Èè, nê—nênjandulé. Nèngǎnjìbi kuteeta cyàkàbìdì.” Mpindyewu, ki kùdì ukafika aku’s, mu mùshindù mulondèle. Mba-Baalàmà búngì kaayi batùdì naabò dilòlò edi, bàdì baswè kukwàta mudimu ne mufùndù wà mafi wà Maatàayi 28.19 awu ànu bwà bwalu bwà kondò kààbò kàà mwoyi? Mbantu búngì munyì bàdì baswè kukwàta mudimu ne Maalàki 4 bwà bwalu bwà kondò kààbò kàà mwoyi? Mbantu búngì munyì bàdì baswè kukwàta mudimu ne Luukà 17.30 ànu bwà bwalu bwà kondò kààbò kàà mwoyi? Mbantu búngì munyì bàcìdì ànu baswè kukwàta mudimu ne bintu ebi, ne: “Èè, ndi nkwambila, ndi—ndi ngeela meeji ne bònsò abu bàdì mu cibwejàkàjì pa Cyòci aci”?

<sup>146</sup> Kàdì pashìishe ki Baalàmà nyèyè ewu ùteeta bwà kwamba ne: “Pàmwàpa misangu mikwàbò Nzambi udi mu cibwejàkàjì. Nèngǎnjìbi kuteeta cyàkàbìdì, wamònu’s, mmonèbi cyàm̀bàYe.” Mpindyewu, Yèyè mmumanyè mwoyi wèbè. Mònaayi, Baalàmà wàkàkwàta mudimu ne mufùndù wà mafi ewu bwà bwalu bwà kondò kèndè kàà mwoyi sungasunga, bwalu, mu bushùwà bwà bwalu, yèyè ùvwà muswè mfrangà ayi. Ùvwà muswè mwànzù mutùmbùke awu. Ùvwà muwùswè. Ùvwà muswè mudimu awu. Ùvwà muswè mwànzù awu, bwà kwikalabò bàmupa luumù, bu Docteur *Kampànda*. Ki yèyè—yèyè—yèyè kwamba ne: “Nèngǎnjìbi kuteeta cyàkàbìdì.”

<sup>147</sup> Kaa, ba-Baalàmà pa buloba dilòlò edi, mbabàlayè myànzù, buulwàkamanyàbo! Kaa, ekèlekèle! Bàdì bàshìya kondò kààbò kàà mwoyi kakwàcisha tukùlākàjì kùdì bintu ebi. Bwà màngumba àbò, bàdì bàm̀ba ne: “Wèwè mwenzè *cikampànda*, udi upàtuka uya. Ndi mumanyè ne udi muntu mwìmpè, ne tudi bakunangè,” ne yèyè mmuntu mwìmpè, “tudi bakunangè. Kàdì kwèna mwà kuyiisha aci to. Dyètù—dyètù dilongesha’s didi dyàm̀ba ne kwèna mwà kwenza nànkù to. Docteur *Kampànda* mmwambè ne ewu ki mùshindù wùdici. Mpindyewu bikèngela ùcìtábùùjè mùshindù ewu, pìikalàbi ne udi ushàala neetù. Mpindyewu, wèwè muswè kucyènza, ndi mumanyè ne udi mupicìle mu cikondo cyà lutàtù, èè, nèmmonèbi ní ncyèna mwà kukubàndisha myànzù, pàm̀wàpa kushintulula maèkèleeziyà.” Kaa, Baalàmà naanyi we! Paùdì mumanyè diswa dyà Nzambi, s’udi udyènza! Nzambi kàakushintululakù mmwènenu Wendè nànsha. To.

<sup>148</sup> Cintu kampànda cìvwàye mufwànyine kupicìla ku luseke, Bulelèlà abu’s, bwà mudimu mumutùma naawù. Kwambayè ne:

“Èè, nê—nênngänjibi kuteeta cyàkàbìdì.” Mònaayi ba-Baalàmà bàdiku.

<sup>149</sup> Pa nàнку vùlukàayi mpindyewu, pààkalwàye mu bufùkù bwibìdì, pàmwè ne muntu mumanyike bikolè ewu, ùkaavwà ne kondò kàà mwoyi kacipàle ne kakwàte tukùlakàji, Nzambi kumulekela ùya. Mpindyewu, Nzambi kààkashintululakù mmwènenenu Wendè to, kàdi kumupèèshaYè diswa Dyèndè dyà cimfùlààmwòyi. “Nàнку ndàaku.” Kàdi kusanganayè ne kabyàkukùmbana to.

<sup>150</sup> Nzambi ùvwa mumanyè cìvwà mu mwoyi wà Baalàmà. Nànsha mùvwàye mupròfetà amu, Yèyè ùvwa mumanyè ne ùvwa mukine bansantu babunguluki bàà mu malaba abu, ne yèyè—ne yèyè ùvwa ànu. . . yèyè—yèyè ùvwa mwà kuswà kubèèla mulawu, nànsha byà munyi. Kàdi Nzambi ùkaavwa mumane kumwambila bwà kacyènji to, kàdi nànsha nàнку kulwayè, muswè kucyènza, kàbìdì, ki Nzambi kumulekela ùya. Nzambi kwambaYè ne: “Ndàaku.” Mpindyewu, vùlukàayi ne, Yèyè kààkashintululakù mmwènenenu Wendè to.

<sup>151</sup> Mònaayi, dijinga divwàye naadi divwa dyà kubèèla mulawu. Bantu bàvwàye mutèèke mu mulongo wà bansantu bakoleshi bàà maalu abu, mbàvwàye muswè kwela mulawu. Ùvwa dijinga ne mwànzù. Kàvwa muswè kujimija naabò dībà to, ki kwelayè meeji ne bu yèyè mwà kwenzelakù mfùmù awu kaacyenzedi kakesè aka, dībà adi ùvwa mwà kubàndishiibwa myànzù. Nzambi kààkashintululakù mmwènenenu Wendè anyi Diyì Dyèndè to.

Kàdi Yèyè neàkupèèshè dijinga dyà mwoyi wèndè, dyà mwoyi wèbè. Wàkalaya nàнку. Nudi bamanyè nàнку anyi? Yèyè mmulayè bwa kukupèèsha dijinga dyà mwoyi wèbè. Kàdi dijinga dyèbè diikalè Diyì dyà Nzambi's. Dijinga dyèbè diikalè diswa Dyèndè, kadikadikù diswa dyèbè wèwè mwinè to. Diswa Dyèndè Yèyè! Byòbi ne Yèyè. . . Wèwè umulòmba cintu, Yèyè kàyi mukupèèsheci to, ambà ne: “Twasàkidila, Mukalenge. Wèwè ngudi mumanyè cìdì cìmpè.”

<sup>152</sup> Tàngilàayi nànsha Mfùmù Hezèkìyà, pààkatùmàYe mupròfetà awu kùdiye, Nzambi ngwàkamutùma, ne wàmba ne: “Tèeka nzùbù wèbè mu bulongàme. Newikalè mwà kufwà.”

Hezèkìyà kukùdimwinayè mpàla ku cimanu ne kwelaye mwadi wà kànjabàlà, wàmba ne: “Mukalenge Nzambi, ndi—ndi nKulòmba bwà ùntwèku mushinga. Ndi mwèndè kumpàlà Kwèbè ne mwoyi mupwàngàne. Ndi muswè bwà Ùndekèlèku nshaalè kàbìdì ne mwoyi bidimu dikùmi ne bitaanu.”

<sup>153</sup> “Èyo.” Nzambi kwakulaYè ne mupròfetà awu, kwamba ne: “Alùkìlà ùkamwambilè ne Ngàmuumvwìdì.”

Kàdi cyàkenzàye ncinyi? S'wàkatwàla bundù pa ditungà dijimà. Wàkabùndula ciiji cyà Nzambi mu mùshindù wà ne

Ùvwa mufwànyine kumushebeya. Ncyà bushùwà. Aci nudi bamanyè. Wàkatwà cìmpingà kumpàlà kwà Nzambi. Bìvwà bifwànyineku kwikala bitàmbe bwimpè, kule ne kule, bwà ditungà, mfùmù, ne bônso, bu yèyè nànsha muyè ne mwanjì kwangata cintu cyà kumpàlà civwà Nzambi mumulongòlwèle aci.

Kàdi byàkamwèka bikolè bwà mupròfetà, pàakakèngelàbi bwà mupròfetà awu kwalukilayè bwà kuya kamwambila Dìyì dyà Nzambi, paanyimà pàà yèyè mumanè kumwambila. Kàdi Nzambi wàkamba ne: “Ndàaku.” Kàdi, nudi numòna’s, s’cyàkatwàla bundù.

<sup>154</sup> Baalàmà wàkenza cinyi? Paanyimà pàà mumanè kumanya diswa dyà Nzambi, kàdi nànsha nànkù ùvwa ànu kacya wàsùminyina, yèyè’s ùvwa ne cyà kucyèenza, nànsha byà munyì. Nènku cyàkenzàci ncinyi? Mònaayi. Yèyè kàakashintululakù mmwènenu Wendè nànsha. Yèyè ùvwa mumanyè civwà mu mwoyi wèndè.

<sup>155</sup> Nudi bamanyè, Toomààsè, musangu kampànda yèyè kàvwà mwà kuciitabuuja to. To, yèyè—yèyè wàkamba ne: “To, mèmè ncyèna mwà kwitabuuja aci to. Bu mèmè mwà kwangata cyanza cyànyì kucibwaja mu lubadi Lwèndè, kucyèla mu misonso ya mu cyanza Cyèndè ayi, èè, dībà adi, dībà adi nê—nèngiitabuuje dībà adi.”

Yèyè ne: “Lwàku apa, Toomààsè. Wamònu anyi? Mpindyewu elàaku byanza byèbè emu nùnkù.”

Mpindyewu, kaa, Toomààsè kwambayè mpindyewu ne: “M’Mukalenge wanyì ne Nzambi wanyì.”

<sup>156</sup> Yèyè ne: “Èyowà, wamònu, nènku mpindyewu witàbùùjì’s. Ndifutu ditàmbe bunène kaayi, dyà bàdì kabàyi bamòne kàdi biitàbùùje’s wè!”

Míngà misangu bantu kabàakupeta Nyumà Mwímpè pàdìbo kabàyi baakùle mu myakulu to. Mèmè ntu ngiitabuuja mu dyakula dyà mu myakulu, cyà bushùwà. Yèyè ùdi Nzambi mwimpè; Yèyè neakupèeshè dijinga dyà mwoyi wèbè. Kàdi nànsha wèwè mwakùle mu myakulu bìshi, kàdi uvila Dìyì edi, udi mu ntùpàkànyì nànsha bìshi. Nwamònu anyi? Nwamònu’s, kwèna ubwela ku dyakula dyà mu myakulu to. Ùdi ubwela nku dilama dyà Dìyì ne Dìyì dyònsò. Ki cileeeji cyà Nyumà Mwímpè ncyòci aci, paùdi witabuuja Dìyì dyà Nzambi. Nwamònu anyi?

<sup>157</sup> Mèmè ntu ngiitabuuja mu dyakula dyà mu myakulu. Ntu ngiitabuuja ne udi mwà kufuùluludiibwa, múngàmbì mu dindà emu amu, mu mùshindù wà ufika too ne ku dyakula dyà mu mwakulu mupyamùpyà. Nkàadi muyàkùle, mèmè mwinè, ne ndi mumanyè ne m’Bulelèlè. Ndi mumanyè ne mmilelèlè. Kàdi aci kí ncimanyinu to, cyà ne wèwè, cyà ne udi mwànà wa Nzambi

musòbola. Nwamònu anyì? To, nànsha kakesè. Yèyè kàtukù mwambè. . .

“Bààbúngì nebàlwe kùNdi bàmba ne: ‘Mukalenge, mémè ewu ncitukù mwambè biprófeta ne mwenzé bintu byònsò binène ebi nu Dîna Dyèbè anyì?’ NeÁambè ne: ‘Ngumùkilaayi apa, nwènu benji bàà bubì, kacya Ncítukù munumanyè to.’”

<sup>158</sup> Wèwè udi wakula mu myakulu kàdi pashiishe ubènga bwà kubàtijiibwa mu Dîna dyà Yesù Kilistò? Kùdi cintu cipampàlámùke mwaba kampànda. Èyowà’s, cyà bushùwà; cyònsò cyà ku bintu abi, dyònsò dyà ku méyi matùma àdi Nzambi mufile awu. Kùdi cintu cipampàlámùke. Kenkètà ànu kondò kèèbè wèwè mwinè kàà mwoyi aku, kàdi ùmonè cìdì—ùmonè cìdì Bible mwambè. Ndeejèku mwaba kampànda wùkaadiku muntu mubàtijiibwe mu dîna dyà “Taatu, Mwàna, Nyuma Mwímpè.” Nwamònu anyì? Kawènakù to. Kàdi, udi umòna’s, misangu mikwàbò bwà bwalu bwà kondò kèèbè kàà mwoyi aku, udi wamba ne: “Èè. . .”

Wèwè udi wamba ne: “Nzambi ùtu wàkula ne bakàjì pa mùdìbo ne cyà kwenza, bwà kabàvwàdi tùpùtulù to ne bikwàbò, kàdi, nudi bamanyè’s, mpaasàtà yèyè mmwambè. . .” Pa nàнку bàngata njila wa maalu mapepèlè’s.

<sup>159</sup> Bòbò’s mbamanyè cìdì Nzambi mwambè Emu nùнку pa bwalu abu. Nwamònu anyì? Bushùwà, s’ki mùdì Nzambi mwambè.

Pa nàнку bòbò—bòbò—bòbò ki cìdìbo baswè kwenza, nànsha bishi, nwamònu’s. Bàdi bàteeta kupeta kabingilà kampànda. “Èè, ngeela meeji ne mbímpè bitàmbe. Kabyèna—kabyèna. . . Lupeepèlè kalùtu lùtuuta. . .” Èyowà’s.

Kàdi Nzambi mmwambè bwà muntu mulùme kuvwàlayè bishilàngàne ne muntu mukàjì. “Muntu mukàjì yèyè muvwàle civwàlù cìdì cikùmbànyìne muntu mulùme, ncinyangù ku mèsù Kwèndè.” Pa nàнку kì mbímpè to, èyowà, ne kabivwa bikèngela wèwè kucyènzà to. To. Nwamònu anyì? Pa nàнку, ki bwà cinyi, mbibì.

<sup>160</sup> Kàdi, nudi numòna’s, bàdi bàteeta kupeta kabingilà kampànda, kàà ne: “Mukalenge ngudi mungambile bwà kwenza cyòci eci.” Mémè ncyèna ngamba ne kì mMukwambilè to, kàdi, tàngilà, kì ndiswà Dyèndè dipwàngàne to. Dìdi ne cyà kwikala diswà Dyèndè dyà cimfùlààmwòyi. Nudi numòna cyènzàci anyì? Necikooyishè musùmbà mujimà. Cyàkakooyisha citùùdilu cijimà.

<sup>161</sup> Mònaayi mwab’ewu, Nzambi kàakashintululakù mmwènenù Wendè, Dìyi Dyèndè to. Kàdi Yèyè n’Nzambi mwímpè, ne neÁakupèèshè dìjinga dyà mwoyi wèbè, nànsha diikàle dibèngangana ne diswà Dyèndè. Nudi nwtabuujà nàнку anyì?

Tàngilàayi, Nzambi wàkambila Mòsà ne: “Pwekà kuntu kwàka,” mupròfetà mulaaba maanyi ewu’s. Yèyè ne: “Pwekà kuntu kwàka wàkulè ne lubwebwe lwàlwa.” Lùkaavwa lumana kutuuta.

<sup>162</sup> Mòsà wàkayakù mu ciiji cyèndè aci, e kwambulayè dikombo, kwambayè ne: “Nwènú bantòmbòji aba, tudi ne cyà kunùkèbela mâyi mu lubwebwe elu anyi?” kàdi kutuutayè lubwebwe alu. Mâyi kaàkalwa to. Kulùtuutayè kàbìdi; kulwawù. Cìvwa cibèngangana ne diswa dyà Nzambi. Cyàkashipa dìnà ndongamu yònsò mu Bible; bìvwa bìkèngela bwà Kilistò àtuuciibwè musangu mwibìdi. Nwamònu anyi? Kilistò wàkatuuciibwa musangu wùmwèpelè. Cyàkashipa ndongamu yònsò mu kaabujimà. Kàdi Wàkamupèèsha diswa Dyèndè dyà cimfùläämwòyi. Pashiishe, paanyimà, yèyè ne: “Nwamònu’s, twanùpetèdi mâyi. Èyowà, nyawù ngänütwàdidiwù, nwènu musumbà wà bantòmbòji aba ewu!”

<sup>163</sup> Nzambi kwambaYè ne: “Lwà apa, Mòsà. Lwà apa. Lwilà kùneeku ku lusongo. . .Wèwè utu musadidi wa lulamatu.” (Byenzè mùdi mukàji muvwàle bilatu byà tulundu’s ne: “Wèwè wabàndi,” nwamònu’s.) “Tàngilà dyàmwàmwa. Udi umòna buloba bulaya abu anyi?”

“Éyi Mukalenge!”

“Kàdi kwàkusabukamù to. Wèwè wangàci diswà Dyànyi dyà cimfùlaamwoyi, ku Lubwebwe eku. Wèwè waditumbishi, wamònu’s, kùyi muNtumbishe Mémè to. Wadijididi wèwè mwinè. Kwèna muNjidile Mémè to. Kwèna mulamè Diyì Dyànyi dyà ku cibangidilu to, cìMvwà mukwambile bwà kwenza aci.” Nànsha nànkù, mâyi àlu ànu mwinè.

Wèwè udi mwà kutentekela babèèdi byanza ne bóbò kusàngala. Udi mwà kwamba bipròfetà, anyi kwakula mu myakulu. Kadi, bwalu bùdi ne, kulamà Diyì Dyèndè dyà ku cibangidilu adi! Nzambi kàtu ùshintulula mmwènenu Wèndè to, mulundà wanyi. Bikèngela ùlamè mudimu Wèndè mukutùma naawù, diswa Dyèndè adi.

“Kaa, èè, aci’s cìvwa mbwà bayiidi.”

<sup>164</sup> Yèyè kàtu ùshintuluka to. PiikalàYe ùcidikù ànu ne muyiidi, ki mudimu wùmwèwùmwè mutùmangana naawù ngwòwò awu. “Ndàayi pa buloba bujimà nùkayiishè Èvànjeeliyò. Bimanyinu ebi nebifilè bàdi bìitabuuja.” Kacya kacitukù cishintùlùke to. Yèyè kèna mwà kushintuluka to.

Mpindyewu, wèwè udi mwà kwamba ne: “Èè, ndi nkwebwambila’s, kaciyèna bwà ditukù edi to.” Kaa, mwena Baalàmà naanyi we! Nudi bamòne anyi? Nwamònu’s, Nzambi kàtu ùshintuluka to. Yèyè udi umwèumwè awu makèèlèlè, leelù, too ne kashidi.



<sup>165</sup> Anjì tàngilàayi ànu beena Baalàmà leelù ewu. “Kaa, ndi mumanyè ne, mu Bible bàtu babàtiize mu Dìnà dyà Yesù, kàdi, tàngilà, bantu bônso . . .”

Cìdi bantu benzè nànsha ciikàle cinyi. “Kakwèna dینگà Dìnà mwinshì mwà Dyulu difila munkaci mwà bantu dìnùdi mwà kusungidiibwakù to.” “Kakwèna dilekelediibwa dyà mpèkaatù to, ànu mu Dìnà dyà Yesù Kilstò.” Cìdi, nànsha wèwè mwimpè wa bishi, cyùdi wenza, aci kacyèna ne bwalu mwòmò to. N’Diyi dyà Nzambì dyà ku cibangidilu; bikèngela ùshaalè ne Dyòdi adi. Yoyòyò! Èyo.

<sup>166</sup> “Ditùmikila ku Dìyi Dyèndè ndimpè kutàmba mulàmbù.” S’nudi bavùlùke musangu wàkaalukilà Shawùlà awu.

<sup>167</sup> Baalàmà ùvwa ne dipà dyà diitabuuja ne ùvwa mufwànyine kwikalakù mukwàte naadi mudimu ku Dìyi dipwàngàne, dyà ku cibangidilu dyà Nzambì adi.

Bantu bàabúngi mu budimi bwà bwambi leelù ewu, ne mapà a dyondopa, s’mbafwànyinekù kwenza cintu cimwècimwè aci. Bantu bàabúngi pambèlù apa, bàakula mu myakulu, bantu bàmba bipròfeta, dipà kampànda, bafwànyinekù kukwàta naadi mudimu bwà Bukalenge bwà Nzambì, kàdi kabèèna bàcyènta to. Bàdi bàngata . . . Kàdi Nzambì ùdi ùbàbènesha, nànsha bishi, bàngata diswa dyà cimfùlààmwòyi adi. Kàdi bwà dimanyika, ne bisànkasanka, makàsà mapeta àbò bóbò biinè, basùmbishe bwanààbutà bwàbò, bu mwàkenzà Esawù amu, nwamònu’s, mubùsùmbishe kùdi bulongodi. Babùsùmbishe, mwàkenzà Baalàmà amu. Nwamònu anyi?

Bàabúngi menemene bàdi bènza leelù ewù cintu cimwècimwè aci. Tudi bamanyè ne ncyà bushùwà. Bàdi bàsùmbisha bwanààbutè bwàbò. Huh! Bakàji bàmba mùdìbo ne Nyumà Mwimpè, eku bàvwàla tùpùtulù; balùme bàànyishila bakàji mu byambilu, bakàji ne nsukì mibebula mu byambilu; ne kwìsù kulaaba bilaabu, bavwàle nkanzu mileemile yà butèndeledi. Dibwè dyà cilèndwishi ditàmbe bunènè dikaadiku èkèleeziyà mupètè.

<sup>168</sup> Nwènu baswè kumanya, mu makolè a cidiidi ne, ndìbà kaayi ditùdi mu cikondo cyà makalenge, mònaayi mwaba wùdi beena Yudà bàsanganyiibwa. Tàngilàayi mùdi beena Yudà, bwalu bàdi ditùnga. Nwènu baswè kumanya mwaba wùdi matùnga miimànyine, tàngilàayi beena Yudà.

Nwènu baswè kumanya mwaba wùdi èkèleeziyà mwimànyine, tàngilàayi bakàji. Tàngilàayi nsòmbelu munkaci mwà bakàji, bwalu yèyè udi cifwànyikijilu cyà èkèleeziyà. Panùdi numòna dikooyika munkaci mwa bakàji, nudi nusangana dikooyika mu èkèleeziyà. Cikaadiye mulwè, Izàbèla mulaaba bilaabu kwìsù, ànu menemene cikaadi èkèleeziyà mulwè. Nwamònu anyi? Mpindyewu, aci ki bulelèlè, ne nwènu nudi bamanyè nànkù. Nwamònu anyi? Panwikalà baswè kumanya

mwaba wùdi èkèleeziyà ùsanganyibwa, tàngilàayi nsòmbelu munkaci mwà bakàji bèènù. Bwalu, cidiye, èkèleeziyà mmukàji.

Nwènù baswè kumanya cipimu cyà ditùnga, tàngilàayi beena Yudà.

<sup>169</sup> Mònaayi, bu mwàkambilà Nzambi Baalàmà, paanyimà pàà yèyè mumanè kuumvwa dipàngadika dilelèlà adi, Diyì adi ne: “Kùyì to.” Èyowà, pashùshe kumwambilaYè, paanyimà pàà Yèyè mumanè kumòna mu—mu mwoyi wèndè amu, cìvwà cìkèngelà kwenza; Wàkamupèèsha diswa Dyèndè dyà cimfùlààmwòyi adi, ki kwambaYè ne: “Ndàaku.”

<sup>170</sup> Ne wèwè udi mwà kwenza cintu cimwècimwè aci. Wèwè kùyì muswè kwendela mu Bulelèlà to, udi mwà kuya kapeta—kapeta mudimu wà bwambi munène. Cyà bushùwà’s, udi mwà kuwùpeta. Kàdi’s udi wangata diswa Dyèndè dyà cimfùlààmwòyi adi. Wèwè’s udi munkaci mwà kudyatakaja Diyì Dyèndè. Yèyè neàkutancishè, cyà bushùwà. Kùdi. . .

Ànu mwàkenzàYe Baalàmà amu. Yèyè wàkatuuta dyàkalenga, kàdi kàvwakù mwà kwela cisàmbà aci mulawu nànsha. Kàvwakù mwà kucyènzakù to. Bwalu, musangu wònsò wùvwaye ànu ne àbangè kwela mulawu, ùvwa ùbènesha. Nwamònu’s, kàvwakù mwà kucyènza to. Kàdi pàakafikàye ku ne ki ditanta ndyòdi edi mu cyenzi cyèndè cyà bulòbo aci, wàkalongesha bantu abu, ùbàlongeshila ku Baalàkà, bwà kwendabò masandi. Kucitwàlayè mu citùùdilu cyà Izalèlèlà ne kubàswikayè mu dibàkà, wàmba ne: “Mòna’s, twètù bònsò’s tudi cintu cimwè. Mòna’s, nwènù’s nudi bakuukwile Nzambi umwèumwè awu. Twètù tudi ne mupròfetà muneemu, ne nwènù nudi ne mupròfetà muntwamu. Ne twètù tudi ne mulàmbù wà mwomùmwè, Yèhowàh umwèumwè mùvwà baataatù bèètù amu. Mpindyewu, bwà cinyì kanùyikù ànu nwènù bònsò nulwa kuswikakana neetù?”

Bible mmwambè ne: “Kanùswikakanyi munkaci mwà beena bupidyà to. Kanùditèèki mu cikòkedi cimwè naabò to, nànsha kakesè. Bòbò kabàyi bàCìitabuuja to, shààlaayi kule naabò.” Nwamònu anyi? “Pàtukàayi, tàpulukàayi,” mùdi Mukalenge wàmba, “nènku Mémè nènnwàkìdilè.” Nwamònu anyi? “Kanùlengi bintu byàbò bibiipe abi to.” Ncyà bushùwà. Bukooyà bùdibo naabù ku Diyì, ne bintu byà mùshindù awu abi, shààlaayi kule naabi. Kanùbitèèleji to.

<sup>171</sup> Nènku apa tudi tusangana ne Baalàmà wàkapweka kuntwaku ne kubanga kulongesha bantu, kàdi ùvwa mu cilèma. Nènku yèyè—yèyè kuya mu njila wa Baalàmà, mwàkenzàye amu, ne kulongesha Baalàkà, ne bânà bàà Izalèlèlà kwendabò masandi. Ki cipùpù kutuutaci ditùngà dyà Izalèlèlà, cisàmbà aci, ne bàakafwà binunu mu ditùkù dimwè.

Ne pàcìvwàbò bònsò mwaba awu apu, kumpàlà kwà cyoshelu cyà Nzambi, munkaci mwà kusambila, ki mwena

Izàlèèlà ulwàlwa ewu ne mukàjì wa beena Miidyànà, mukàjì wa cyena màngumba, ki kubwelabò mu ntentà. Kàdi mwànà wa balùme wa mwakwidi kulwayè mwab'awu, kwangatayè difùmà ne kubàshebeyayè bònsò bàbidì. Ki aci kwimanyikaci ciji cikolè cyà Nzambì aci. S'nudi bamanyè ne aci m'Mufundu awu. Ncyà bushùwà anyi? Nwamònu anyi?

<sup>172</sup> Kàdi cyàkenzekà ncinyi? Baalàmà, yéyè wàkatuuta dyàkalenga mu kutekesha kwà makàndà a Izàlèèlà. Cyàkenzàye ncinyi? Wàkatekesha makàndà a citùùdilu cyàbò. Nzambì kumulekelayè ùtùngunuka nànkù ne ùtekesha makàndà a citùùdilu cyàbò, ne cyàkakooyisha citùùdilu cijimà.

Nènkù pàdi dilongesha kampànda dibanga, didi kadiyi Bulelèlà bwà Bible, didi dikooyisha citùùdilu cijimà. Muntu kampànda ùjuuka ne mmwènenù mushiilàngàne, bu Koolà, wàmba ne: “Èè, *cikampànda*, *cikansanga*, ne *cikankènga*, kàdi mèmè ndi ne mmwènenù mushiilàngàne,” cidi cikooyisha citùùdilu cijimà. Ne ki cidi cyenzè citùùdilu cijimà cyà èkèleeziyà leelù ewu ncyôci aci. Ncyà bushùwà.

<sup>173</sup> Ûlongesha mwàkalongeshàye amu, ùtekesha makàndà a citùùdilu cijimà cyà Kaadèsà-baanèà, diteetangana dyà makàndà dyà Dìyi. Pààkafikàbo ku Kaadèsà-baanèà, dībà adi, ditekeshiibwa dyà makàndà a cituudilu. Bààkaalukila. Bàvwa bayè buludì pàànyimà pàà . . .

Vùlukàayi ne, bàvwa badyè cyàkudyà cyà banjèlo. Bàvwa ne Dìyi dyà Nzambì, dilòlò dyònsò, dimwènèshìibwe. Ne bààkadyà cyàkudyà aci. Bààkanwà ku lubwebwe. Bààkenza byònsò, kumòna bishimà. Bààkatàngila Mòsà, ne bààkamòna dīyi dyèndè, kumòna bipròfetà byèndè, bintu byònsò.

Ki ndekeelu wa byònsò pààkatèelejàbo mulongeshi wa mashimi ewu, mubwelè munkaci mwàbò ne mulongèshe cilèma, yéyè kutekesha makàndà a citùùdilu, ne kutancilayè ku cyôci aci.

Ûvwa mufwànyine kwikala mwibàke nzùbù yà mùliyò mujimà wà ndola. Ûvwa mufwànyine kwikala mupetè màngumba manène. Ûvwa mufwànyine kwikala musàkidile binunu kuvudija ku binunu, ne mwenzè byenzi binène, ne byenzi byà bukolè, ne mwikàle mupròfetà. Abi bìdi ànu bìmpè's, kàdi, bu mùdibi ne kabyèna bipetangana ne Dìyi dyà Nzambì, mbìmpè ùshaalè kule naabi.

Nzambì kàtu ùshintulula mmwènenù Wèndè nànsha. Shààla wèwè ànu ne Dìyi Dyèndè, bwalu ki cyàpàtukilà patòòke ku ndekeelu, Dìyi, ku Dìyi ne ku Dìyi. “Ewu yònsò wadidìnga kuumushilaKù Dìyi dimwèpelè, anyi kuKùsàkidila dīyi dimwèpelè awu!” Bikèngela dīshaalè, Dìyi adi.

<sup>174</sup> Mpindyewu tèelejàayi ne ntèmà mpindyewu. Pààkalwà diteeta dyà Dìyi, pààkayàbo dyàmwàmwa ne kumònabò dikàndameena bunènè bùvwadi, dikàndameena dyà ditàmbe

bunènè dyà kacya bààmòna, beena Amàlèkà bàvwa—bàvwa babàtàmbe bóbò bunène ne bule misangu dikùmi. Bààkamba ne: “Twètù’s tudi tumwèka ànu bu tupasu. Bimanu byàbò, anyi bimenga byàbò mbyela mu bimanu mu mùshindù wà ne bàdi mwà kunyeemenapù ne dikalù dyà mvità bènda bànyùnguluka, màkalù a mvità àbìdì, bàyapù lubilu ne mwàbò mwònsò, bànyùngulukila pa bimanu abi, nwamònu’s, byà bimenga byàbò abi. Mòna’s, mafùmà àbò mmanène, mmale. Ne bóbò mbantu banènè bàà mfyondo. Mòna’s, twètù tudi tumwèka ànu bu tupasu. Katwèna mwà kucyènzakù to.”

Ki bantu bàbìdì kwimanabò pa Dìyì adi, Kaalèbà ne Yoshùwà, kwambabò ne: “Anjì indìlaayi kakesè! Nwènù bantu mìliyò yìbìdì anjì bwikìlaayikù mukana mwènù amu ndambù tũng. Twètù tudi batàmbe bukolè bwà kucyènza. Nwamònu’s, tudi babàtàmbe mu mùshindù wà katùyìkù mwà kufwànyìkijìibwa naabò to.”

Bàvwa bashindàmèène pa cinyi? Nzambi wàkamba ne: “Ngănùpèèshi buloba abu. Mbwènù nwènù.” Nènku ki pàvwàbò biimànyie mpòpò apu. Kàdi bantu abu bàkaavwa basèlàngàne, munkaci mwà bikwabo bintu abi, ne twìtabàayi ne mishìngà yà mishindù yònsò munkaci mwàbò, ne bashààle ànu batekètàngàne, batundùbile, bapangè ne kwà kukùdimukila ne cyà dyenza. Ncyà bushùwà. Ki kulwakù diteeta dyà Dìyì’s.

<sup>175</sup> Kàdi pààbì’s, Yèyè ùdi ùkupèèsha dyanyisha dyà kwenza, wànyishila diswa dyèbè wèwè, diswa dyà cimfulààmwòyì adi, mumanyè ne . . . Cìdì mu mwoyi wèbè aci, Yèyè mmucimanyè.

Wèwè udi wamba ne: “Èè, Mwanètù Branham, mèmè’s ntu ngenza *cikampànda*. Kabìtu bintàcisha to. Nzambi’s nyewù ùmbènèsha ditùkù dyònsò. Ntu ngimba misambu mu Nyumà. Ntu njà maja mu Nyumà. Ntu . . .” Yèyè neàcyànyishilè. Ndà wèwè ànu kumpàla. Ncyà bushùwà. Kàdi ciwikalà mwà kwenza ncinyi?

<sup>176</sup> “Mèmè ntu mvwàla tùpùtulù, ne ngenza *bikampànda*. Kabìtu bintàcisha to. Ndi mumanyè ne diitabuuja dyànyì didi mu Kìlistò, kadyèna mu bìndì mvwàla to.”

Kàdi, Bible’s mmwambè ne kùdi cintu kampànda kwòkù aku. Nwamònu anyi? Ciwènzà ncinyi? S’newikalè dibwe dyà cilèndwishi, bu Baalàmà, kumpàlà kwà yònsò wa ku bakàjì bakwàbò abu. Ciwènzèlà nsongààkàjì yèbè yà bitende ayi ncinyi? S’neùpetè musùmbà wà ba-Rickettas, s’ncyà bushùwà menemene, musùmbà wà tu-Izàbèlà tudìlaabè bilaabu kwìsù. Nwamònu anyi?

<sup>177</sup> Cìbì Nzambi neàkutancishè. “Mòna’s, Yèyè’s ùdi ùmbènèsha.” Aci ncyèna ncyèla mpatà to. Yèyè’s wàkabènèsha pèndè Baalàmà. Nwamònu anyi? Ncyà bushùwà ne neÀkubènèshè. Wèwè udi wendela mu diswa Dyèndè dyà cimfulààmwòyì, kadiyi diswa Dyèndè dipwàngàne to. Nzambi

kàtu ùshintulula mmwènenenu Wèndè ne, bwalu Ûdi ùkubènesha to.

Yèyè's wàkabènesha Izalèlèlà kuntu kwàka munda mwà bidimu makùmi ànaayi. Bààkenza cinyi? Bààkasèla bakàji, kujuula mèkù, kuupulila bânà, kufuta byàdiikùmi byàbò, kusòmbabò kuntwaku mene. Ne Nzambi wàkababènesha mu cipèèlà awu, ngwàkabàdiisha ne manà, ànu nàнку ànu nàнку. Kàdi yònsò wa kùdìbo's wàkabùtuka, bwalu kabààkalamakù Dyendè dyà ku cibangidilu, dyà cimfulààmwoyi...diswa Dyendè dyà ku cibangidilu to, Dìyi Dyèndè. Bààkangata njila Wèndè wa cimfulààmwoyi.

<sup>178</sup> Ndàaku wèwè ànu kumpàla, kàdi, wavùluka ne, pààkuumukàbo ku Kaadèsà, kabààkayakù kule nànsha. Bààkaya ànu bènda banyùnguluka bènda banyùnguluka, mu cipèèlà amu. Pàabi, nùнку's mbapàtùkemù, mu matùkù àbìdi paanyimà pàà cyòci aci, nùнку's mbakabwelè mu buloba bulaya amu. Bààkenza lwendu bidimu makùmi ànaayi, ne yònsò wa kùdìbo wàkafwà pa kuumusha ànu Yoshùwà ne Kaalèbà, bàvwà bashààle pa Dìyi dyà ku muji adi abu.

<sup>179</sup> Éyi Nzambi, watùkwàcishakù's. Nzambi kàtu ùshintulula diswa Dyèndè to. Kàtu ùshintulula mmwènenenu Wèndè to, kàdi neÀkubènèshè.

Bushùwà, Yèyè wàkabènesha Baalàmà. Kàdi cyàkenzàye kuntwaku ncinyi? Yèyè's wàkakooyisha citùùdilu cijimà. Nwamònu's, bikèngela ùshaalè pa cyàkambàYe. Yèyè kààkushintululakù ndongamu Wèndè wa ku cibangidilu to.

<sup>180</sup> Mpindyewu anjì tàngilàayi ba-Baalàmà leelù ewu, mu budimi bwà bwambi, s'mmwòmò's. Anjàayi ànu kutàngila ku nseke yònsò. Bènda bàtanta, bààkula mu myakulu, bushùwà's, bàkwàta mudimu ne dipà dyà Nzambi bwà kupeta mfranga, ne byònsò, cyà bushùwà. Kàdi's cidi cikoooyisha èkèleeziyà mujimà wa Nzambi ku dilongesha dyàbò dibolè adi. S'ncyà bushùwà.

Mukwàbò wàkangambila, wàmba ne: "Udi wenza *cikampàndà* bwà cinyi? Udi wenza *cikansanga* bwà cinyi?"

Mèmè ne: "Kwèna witabuuja ne Aci m'Bulelèlà anyi?"

<sup>181</sup> "Kaa, èyowà's. Kàdi," yèyè ne, "udi mumanyè mùdi bwalu anyi? Aci kî ncikutàngile wèwè to. Bùdi wèwè naabù mbwà kusambidila babèèdi. Bòbò mbiitàbùùje ne wèwè udi mupròfetà. Mòna's, s'uvwakù mufwànyine kulongesha bakàji abu mwà kwenza, ne balùme abu, mwà kwenza *cikampànda*, *cikansanga*, ne *cikankènga*."

"Mmunyi mùdi mwà kubàlongesha makùmi makolè pàdìbo kabàyi nànsha baswè kulonga ABC? Huh? Huh? Mmunyi mùdi mwà kubàlongesha abi bintu pàdìbo kabàyi nànsha baswè kwangata byà mbangilu?" Nwamònu anyi? Bidi bikèngela wànji kwalukila bwà kubangila mwaba wúvwà mutwàdijile awu,

anyì wúvwà mushiikidile awu, kàdi wàngatè Díyì dyònsò dyà Nzambi.

<sup>182</sup> Anjàayi ànu kucitàngila mu madimi a bwambi leelù ewu. Ànu mwàkabwejià Baalàmà ndumbà mu èkèleeziyà wa Nzambi, ku dibàkà, mubwejià ndumbà, mu èkèleeziyà wa Nzambi ku dibàkà, ki mùdi kàbìdi balongeshi bàà mashimi aba leelù ewu bàteeta bwà kunwàmbila. Nebàbwejè bwònsò bwà ku malongolodi aa ne bantu aba mu ndumbà wa kale wa mu Bwàkabuulwibwà 17 awu ku dibàkà. Dilongesha dyàbò dyà Baalàmà adi didi dyèndakana eku ne eku leelù ewu, bàmba ne: “Tudi ànu cintu cimwè. Tudi bònsò beena Kilistò.” Ne bansaserdòse ne baapaapa, ne bakwàbò bònsò, bònsò bàdya cibàngà ne bènza cyòci eci.

<sup>183</sup> Muiiishi mmwambè...Ndi mene mumanyèku muiiishi wa beena Mpenta, bwònsò bwàbò, mbabangè mpindyewu kupèeshangana kaadyàmpà kàà kòsher kàà cijèngù. Ciikàle cyùmvwija ne: *Ashtarté*, “nzambi-ngondo,” kaacyostiyà kàà kòsher. Wamba ne: “Bwità kwìsù ùcyàngatè, piikalàci citàpa kondò kèèbè kàà mwoyi.” Ubwita kwìsù? Kaacyostiyà kàà cijèngù, kàdi kùmvwija cinyi? Twètù tudi twangata mubidi mucibula, Yesù Kilistò, mucibula; kàyi nzambi-ngondo wa cijèngù, *Ashtarté*, utu Màriyà mwangàte kaaba kèndè awu to. Ne kaakòsher kàà beena Loomò kàcitu ànu kàà cijèngù aku, bwà nzambi-ngondo, nzambi mukàjì awu, kàyi nzambi mulùme to. Tudi twètù ne kòsher mucibula, cyà bushùwà. Kaa!

<sup>184</sup> Pa nàнку mpindyewu ndumbà munène wa mu Bwàkabuulwibwà 17 awu, balongeshi bàà Baalàmà aba ne dilongesha dyàbò dyà mashimi adi, bàdi bàbweja èkèleeziyà mu cimvundù cyà mùshindù awu aci ku dibàkà. Tàngilàayi nùmonè pàkaadìbi bìkafika ku diteetangana dyà makàndà ku cikondo cyà nshìikidilu, tàngilàayi butekètè bwàci mpindyewu. Malongolodi mashiilèshìilàngàne nkàmà citèemà ne byà mu njila, ebu bùkòkela eku, ne ebu bùkòkela kukwàbò. Kakwèna bwobùmwe munkaci mwàbò to. Kàdi bàdi bàteeta bwà kutwàla bwobùmwè; kabùyì butwà nyama ku mikòlò kùdì Díyì dyà Nzambi to, ndongamu wa Nzambi wa ku cibangidilu awu. Bàdi bàcibwejià ku cidiidi ne bulongolodi kampànda.

Nzambi kàtu ùshintulula mmwènenenu Wendè to. Ùdi ùshààla ànu ne Díyì Dyèndè. Yèyè mmwambè ne: “Maulu ne buloba nebijiminè, kàdi Díyì Dyànyì kadyàkujiminakù to.” Ncyà bushùwà. Yèyè ùdi ùshààla ne Díyì Dyèndè dyà ku cibangidilu. Kaa, ekèlekèle!

<sup>185</sup> Nànsha mùcidìbo ànu bàlukakaja lungènyì bàCilwisha, ànu mwàkenzàbo amu, ne ànu...Kùdi cintu ànu cimwèpelè cyà dyènta. Yèyè kàakuCìshintululakù to. Itàbùùjaayi ànu cyanàànà. Bwalu, maulu ne buloba byònsò bibìdi nebijiminè; Díyì Dyèndè kadyàkupàngilakù to. Nwamònu anyi?

<sup>186</sup> Nudi numòna mwaba wunùdi nukabwelela mu dibàkà anyi? Nudi numòna cidiidi ne bikwàbò, mùdibo bàteeta bwà kuswikakaja èkèleeziyà pàmwè ku cidiidi mu èkèleeziyà anyi? Twètù katwèna baswikakaja kùdi Kilistò ku cidiidi nànsha.

Tudi baswikakaja ku Èkèleeziyà, kùdi Kilistò, ku dibàtiiza dyà Nyumà Mwimpè. Ne mùshindù wùdi umanya dibàtiiza dyà Nyumà Mwimpè, mbwalu Nyumà udi munda mwèbè awu ùdi ùmanyisha Dìyi ne Dìyi dyònsò dyà Nzambi ne m'Bulelèlè. Ncyà bushùwà. “Bwalu ewu yònsò wadidìnga kuumushilaKù Dìyi dimwè, anyi kuKùsàkidila dìyi dimwè awu, cyèndè citùpà necyùmushiibwè ku Mukàndà wa Mwoyi.”

<sup>187</sup> Nànsha nàнку: “Yèyè’s nyawù ùtanta,” mùdi wamba. Kwèna mwà kwitabuuja Aci ku ditanta to. Kwèna mwà kulumbulwishila Nzambi ku ditanta to. Bàà pa buloba bàdi bàtanta. Baalàmà wàkatancila ku cyòci.

Kàdi, mwanèètù, udi ulumbulwishila Nzambi ku Dìyi Dyèndè. Yèyè ùtu ùshààla mukwàte ku Dìyi Dyèndè ne ùmanyisha Dyòdi adi ne m'Bulelèlè. Pa nàнку, wavùluka, wèwè mulundà wanyi, matùkù èbè ònsò à mwoyi, kùpukù eci mwoyi to: Nzambi kàtu ùshintulula mmwènenù Wendè nànsha. Kàdi, penDè’s neàbeneshè. Neàkulekèlè uyiiila ku diswa Dyèndè dyà cimfùlààmwòyi adi, kàdi Yèyè kààkushintulula mmwènenù Wendè nànsha. Kààkushintulula ndongamu Wendè to. Kààkushintulula Dìyi Dyèndè to, bwèbè wèwè. To, mukalenge.

Bikèngela wèwè ùshintulukè. Kwèna mwà kwenza bwà Dìyi dyà Nzambi dikumbananganè ne dilabula dyèbè to; wèwè ngudi ne cyà kwenza bwà dilabula dyèbè dikumbananganè ne Dìyi dyà Nzambi. Nwamònu anyi? Ki mùshindù wùdibi bikèngelà bwà wèwè...

Wèwè udi wamba ne: “Èè, mèmè’s ndi muntu mwimpè. Nzambi ùdi wenza *cikampànda*, *cikansanga*, anyi *cikankènga*.” Kàdi utu ulama Dìyi Dyèndè anyi? “Kaa, èè, ndi nkwabwila’s, aci kacyèna ànu. . . To.” Èyo, kùdi cintu cipampàlàmuke mwaba kampànda. Nzambi neikalé mwà. . . Èyowà, Yèyè neàkutancishè. Bushùwà, neÀkuvwijè. . .

<sup>188</sup> Màngumba àdi àtanta mu mùshindù wà bònsò badimwène! Bàdi bààlabaja ntentà yàbò, èkèleeziyà minène, milenga ayi, ne bikwàbò byònsò, mu ditungà dijimà. Yòyi mmibanji, ne mfrangà yipòngolokelamù, ne bidimba bifùmina myaba yònsò. Bible kàtukù mwambè ne: “Mu yèyè mwàkasanganyibwa mene ne mabanji a pa buloba, nànsha mene misùukà yà bantu,” ne bikwàbò byònsò, byàkasanganyibwà mu ndumbà wa kale ewu abi, udi maamù wa cintu cyònsò mu kaabujimà aci awu, cidiidi ne bulongolodi?

<sup>189</sup> Kàdi kasumbù kakesè kàà Nzambi aku ki Mukàj’Èndè-musèla, mushindamijila pa Dìyi adi. Taatù wa mu Dyulu

munanga ànùlamèku kashidi bajaalamija mwaba awu mene. Kanùumukukù ku Dìyì adi to.

Wèwè udi mwà kubènesha, udi mwà. . . Nzambì ùdi mwà kwondopa babèèdi bèèbè. Ùdi mwà kwondopa mwanèèbè wa mu dibòko udi usaama awu. Ùdi mwà kwondopa bàyèebè, mukàjèèbè. Ùdi mwà kwondopa mamwèbè, muntu kampàndà mukwàbò. Wèwè udi mwà kutùpika ku Nyumà Wendè, ne kujà maja ubànda upweka.

Wavùluka ne, mvùla ùtu ùlòkela bímpè ne babì, mùshindù ànu wùmfwèmwè awu. Kàdi pàdì dimiinu adi ditéèka mwaba awu apu, anyì ndilongolola anyì kí ndilongolola to. Kàdi dyòdì dilongolola, didi mwà. . . Dyòdì diikàle blé, didi ne cyà kukwàma blé. Dyòci Dìyì dyà Nzambì, didi ne cyà kupàtula Dìyì dyà Nzambì. Kabiyi nàнку to, èè, nàнку kí ncyòci to. Nwamònu anyì? Mpindyewu nuumvù aci anyì?

<sup>190</sup> Mukalenge ànùbènèshè. Mwab'ewu mwawa munwàmbile ne nèngùmanyikè pa díbà citèemà jaajaaja, kàdi mònaayi, tusunsa makùmi àbìdi kumpàla kwà díbà dikùmi. Bààbùngì bàà kunùdi, bàdi ne cyà kuya ntàntà mile. Ndi munùangè. Ne cìndi munùlamine mùshindù ewu, kí mbwalu ndi muswè kwikala ne lwonji kunùdi to, kàdi ndi munùangè. Ne cìndi mémè mumanyè, ncyèna nsokoka cintu nànsha cìmwè to; ndi nnwàmbila Bulelèlà.

<sup>191</sup> Mu masangisha a kùntù nya, kanùtukù nungumvwa nyiisha Mayiisha aa to. To, mwawa munùlayè ne, nèndwe ku tabernacle eku. Ànu apa ki pàntù nyiishila Mayiisha àànyì. Ndi naawù àsàtù anyì ànaayi kaaba aka, àdi Mukalenge mumpèeshe, ndi ne Mifundu pa wòwò awu, àndi nciyikù mwà kudidìnga kuyiisha mwaba mukwàbò kanà wònsò to ànu kaaba aka. Apa mpààkabangà Dìyì dyà Nzambì kupàtukila. Nèнку, too ne pàacishintululà Nzambì, ndi nshààla ànu apa ne mbìpàtwila ànu kaaba aka. Ncyà bushùwà.

Mu masangisha a kuntu kwàka, ntu nsambidila babèèdi, ne byònsò byà mùshindù awu; ne, ku luseke, ndi ngamba bintu mu mùshindù wà munyùngùlùke, bwà mùkòòkò kucyùmvwawù. Bòbò mbamanyè cidici cyàmba. Mu mùshindù mukwàbò, cidi ànu cìshì ku ndòbo, nudi numòna's. Ndi ndeeja bimanyinu byà—byà kuteeta kuleeja ne Nzambì mmumanyè, mu djingulula, ne mmumanyè myoyi yà bantu, ne ngudi wènta bintu ebi. Adi ndipà dyà butangadiki, ànu bwà kusalulakù bantu cyanààna.

Katanci aka, mukàbà wà mèyì wùdi wùmata mu nzùbù mwàbò. Awu wàmupèci, díbà adi. Yèyè mwikàle mùkòòkò, ùdi ùdisanga ku cyòci. Yèyè mwikàle mbùji, ùdi wimansha mukàba wa mèyì awu. Uh-huh. [Mwanèètù Ben Bryant ùdi wàmba ne: “Ne wèwè pèèbè.”—Muf.] Nudi numòna's, aci's. . . “Ne wèwè pèèbè,” ncyà bushùwà, Ben. Aci, ncyà bushùwà menemene. Ben ùkàadi mwenzèku dilabula kampànda. Èyo. Èè, ncyà bushùwà.



192 Kanwènaayikù ne disànkà dyà kwikala Bèndè Yèyè anyi? Kanwènaayikù ne disànkà anyi? Kale wàwa tuvwa twimba kaamusambu kakesè kàà cyena Mpenta, kùkaadi ntàntà mule, kàà ne:

Ndi ne disànkà dyàbùngì mùdi Mukalenge mumpàtùle;

Ndi ne disànkà dyàbùngì mùdi Mukalenge mumpàtùle;

Bu kabùyi bwà Yesù, mvwa mufwànyine kwikala penyi?

Ndi ne disànkà dyàbùngì mùdi Mukalenge mumpàtùle.

Kaa, ntu ne disànkà kacya ànu Mukalenge wàmpàtula;

Ntu ne disànkà kacya ànu Mukalenge wàmpàtula;

Bu kabùyi bwà Yesù, mvwa mufwànyine kwikala penyi?

Ntu ne disànkà dyàbùngì kacya ànu Mukalenge wàmpàtula;

Ntu ngeela mbilà kacya ànu Mukalenge wàmpàtula;

Ntu ngeela mbilà kacya ànu Mukalenge wàmpàtula;

Bu kabùyi bwà Yesù, kaa, mvwa mufwànyine kwikala penyi?

Ntu ne disànkà dyàbùngì kacya ànu Mukalenge wàmpàtula;

Butùmbi's wè! Nwènù kanwènaayikù ne disànkà anyi?

Wèwè kwènàku ne disànkà . . .

Tùwimbàayi.

Wèwè kwènàku ne disànkà mùdi Mukalenge mukupàtùle anyi?

Wèwè kwènàku ne disànkà mùdi Mukalenge mukupàtùle anyi?

Bu kabùyi bwà Yesù, kaa, mvwa mufwànyine kwikala penyi?

Ndi ne disànkà dyàbùngì mùdi Mukalenge mumpàtùle.

Èè, ntu ànu ngimba misambu kacya ànu Mukalenge wàmpàtula;

Ntu ànu ngimba misambu kacya ànu Mukalenge wàmpàtula;

Bu kabùyi bwà Yesù, kaa, mvwa mufwànyine kwikala penyi?

Ndi ne disànkà dyàbùngì mùdi Mukalenge mumpàtùle.

Nwênù kanwènaayikù ne disànkà bwà bwalu abu anyi? Dìbà adi *Netwèndelè Mu Bukênkè*. Nudi bamanyè musambu awu anyi?

Netwèndelè mu Bukênkè, M'Bukênkè bulenga be,  
 Bùlwa mwaba wùdì mamata a lumuma a luse àbàlakana;  
 Kenkèshàku mu nyùngulukilu wetù mwònsò muunyà ne bufùku,  
 Kaa, Yesù, Bukênkè bwà bàà pa buloba.

Kanwènaayikù banangè aci anyi? Twànji tùwìmbàayi cyàkàbìdì tǔng.

Netwèndelè mu Bukênkè, M'Bukênkè bulenga be,  
 Bùlwa mwaba wùdì mamata a lumuma a luse àbàlakana;  
 Kenkèshàku mu nyùngulukilu wetù mwònsò muunyà ne bufùku,  
 Kaa, Yesù, Bukênkè bwà bàà pa buloba.

Ndijuuka dyà dìbà's!

Nwênù bansantu bònsò bàà Bukênkè ambàayi ne:  
 Yesù, Bukênkè bwà bàà pa buloba;  
 Bulelèlè ne luse mu Dìnà Dyèndè,  
 Yesù, Bukênkè bwà . . .

Mpindyewu twèlàayi byanza muulu patùdì tuwìmba apa.

Kaa, netwèndelè mu Bukênkè ebu, M'Bukênkè bulenga be,  
 Bùdì bùlwa mwaba wùdì mamata a lumuma a luse àbàlakana;  
 Kenkèshàku mu nyùngulukilu wetù mwònsò muunyà ne bufùku,  
 Yesù, Bukênkè bwà bàà pa buloba.

Labùlàngànaayi ku cyanza muntu ne mukwèndè.

Kaa, Bùdì bùlwa mwaba wùdì mamata a lumuma a luse àbàlakana.

Kanwènaayikù ne disànkà munùdì bânà bàà Bukênkè anyi? Mwànà wàjuukù.

. . . mu nyùngulukilu wetù mwònsò muunyà ne bufùku,

“Bânà bakesè, nangàngànaayi muntu ne mukwèndè.”

Kaa, netwèndelè ànu mu Bukênkè cyanààna,  
Mbulenga be... (Dimwèneshiibwa dyà Dîyì  
Dyèndè.)

Bùlwa mwaba wùdì mamata a lumuma a luse  
àbàlakana,  
Kenkeshàku mu nyùngulukilu wetù mwònsò  
muunyà ne bufùku,  
N'Yesù, Bukênkè bwà Dîyì.

Nwènu bònsò nudi nuciitabuujà anyì?

Tudi twenda tuya batàngìle ku Siònà,  
Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumòna cyà Nzambì aci.

Kaa, tudi twenda tuya batàngìle ku Siònà,  
Bòbò abu bàbengè kwimba  
Bàtu kacya kabàyi bamanyè Nzambì wetù abu  
abu;

Kàdi bânà bàà Mfùmù wa mu Dyulu,  
Nènku kàdi bânà bàà Mfùmù wa mu Dyulu,  
Nènku bàdi mwà kwamba masànkà àbò nseke  
ne nseke yònsò,  
Bàdi mwà kwamba masànkà àbò nseke ne  
nseke yònsò.

Bwalu tudi twenda tuya... (Butùmbi's we!)  
Siònà mulenga, mulenga kumòna awu;  
Kaa, tudi twenda tubànda batàngìle ku Siònà,  
Cimenga cilenga kumòna cyà Nzambì aci.

Kaa, tudi twenda tuya batàngìle ku Siònà,  
Kaa, Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumòna cyà Nzambì aci.

<sup>193</sup> Pàtulà mùshwalà wèbè. Pàtulàayi mishwalà yènu, ànu bwà  
katanci kakesè cyanààna. Tùpeeshàayi Mukalenge mulàmbù wà  
dinyùkusha. Kì cisèkiseki to, kàdi bàvwa bàngata pambidi pàà  
Pòlò mishwalà ne bikwàbò bintu, nwamònu's.

Kaa, tudi twenda tuya batàngìle ku Siònà,  
Kaa, Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumòna cyà Nzambì aci.

Kaa, tudi twenda tuya batàngìle ku Siònà,  
Kaa, Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumòna cyà Nzambì aci.

<sup>194</sup> Amen! Kaa, kacýèna cinùfikishakù ku didyùmvwa bìmpè  
anyì? Ndi ànu mwà kudifwànyikijila bansantu bàà kale abu  
kuntu kwàka, kumpàlà kwà kubwelabò mu cipalu cyà manàyi

cyà beena Loomò aci kuntu kwàka, bàbanga kubànda kakùnà aku, nudi bamanyè's, bàbànda pa kaacibàndilu kakesè aku, bàbànda bàkabwela mu bwinà bwà nyama yà ntambwe, bènda bàmba ne:

Kaa, tudi twenda tuya batàngìle ku Siònà,  
Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumònà cyà Nzambi aci.

Mpàtà yà Siònà yìdi yìfila  
Tulolo cinunu tunsantu  
Kumpàlà kwà twètù kufika ku Nkwasa wa  
butùmbi wa mu Dyulu,  
Kumpàlà kwà twètù kufika ku Nkwasa wa  
butùmbi wa mu Dyulu,  
Anyì kwendela mu mìsèèsù yà ngòlò,  
Anyì kwendela mu mìsèèsù yà ngòlò.

Tudi twenda tuya batàngìle ku Siònà,  
N'Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumònà cyà Nzambi aci.

195 Ambùlùlaayi paanyimà pàànyì:

Mukalenge Nzambi, ndi ndicìpa cyàkàbìdi k'Ùdì. Nkezùlèku ku bubì bwònsò. Nkezùlèku ku mpatà yònsò mu Dìyì Dyèbè. Enzàku bwà ne, kuumukila ku Paasàkà ewu, ngiikalè cifùkiibwà cipyacipyà mu Kìlistò Yesù. Ngiikalèku mwambùle, mu mwoyi wànyì, Dìyì Dyèbè. Swàku bwà Dìikalè Mwèndù ku makàsà àànyì wikalà mwà kukenkesha mu kajila kàànyì. Kubàngila ku mpindiyewu nènKulondè. Mu Dìnà dyà Yesù. Amen.

Tudi twenda tuya batàngìle ku Siònà,  
Kaa, Siònà mulenga, mulenga kumòna awu;  
Tudi twenda tubànda batàngìle ku Siònà,  
Cimenga cilenga kumònà cyà Nzambi aci.

196 Aci kacyèna cinùfikishakù ku didyùmvwa bilenga anyì? Twadìcipi cyàkàbìdi, bamanyè ne munda mwà mwoyi yètù tudi bafùlùlùdiibwe ku bafwè, bavwijìibwe ne mwoyi. Aci kacyèna cinùfikishakù ku didyùmvwa bilenga anyì? Èkèlekèle, kaa, èkèlekèle! Ndi munùngè, ne dinanga dyà kadìyi difwa to.

Tèèlejàayi. “Nùnganganàayi muntu ne mukwèndè. Bwalu kwèna mwà kukina mwanèènu, ùdi umòna, kàdi kwamba mùdi munangè Nzambi to, Ùdi kùyì mumòne awu.” Nwamònu anyì? Pa nàнку nangàngànaayi ànu muntu ne mukwèndè.

Pashìshe, panùdi nukwàcilangana mudimu muntu ne mukwèndè, Nzambi ngunùdi nukwàcila mudimu awu. Ncyà bushùwà anyì? “Panùdi nwenzela udi mutàmbe bukesè wa ku bàdi ne Bukolè bufùluludi munda mwàbò aba, Mèmè ngunùdi bacyènzèle.”



Dìna dyà mushinga, (Dìna dyà mushinga!) Éyì  
dyà bupòle be! (Éyì dyà bupòle be!)  
Ditèkemena dyà . . .

Nzambì munanga, ondòpàku bantu aba. Ndi nKulòmba,  
Taatu, mu Dìna dyà Yesù. Ènzàku nànkù, Mukalenge, mùndi  
ndòmba.

. . .Éyì dyà bupòle be!  
Ditèkemena dyà buloba ne disànkà dyà Dyulu.  
Too ne patwàsangilà! too ne patwàsangilà!  
Too ne patwàsangilà ku makàsà a Yesù;  
Too ne patwàsangilà! too ne patwàsangilà!  
Nzambì ikalè neenù too ne patwàsangilà  
cyàkàbìdì.


Twìnyikààyaaku mitù yètù mpindyewu.

[Mwanèètù Branham ùdi wimbila *Nzambì Ikalè Neenù*  
mu matàma—Muf.] Éyì Nzambì, ikàlàku neetù. Tùkwàcishèku,  
Mukalenge.

. . .patwàsangilà ku makàsà a Yesù! (Too ne  
patwàsangilà!)  
Too ne patwàsangilà! too ne patwàsangilà!  
Nzambì ikalè neenù too ne patwàsangilà  
cyàkàbìdì.

<sup>200</sup> Ncyà bushùwà ne ki dyànyì disambila ndyòdì adi. Too  
ne patwàsangilà cyàkàbìdì, Nzambì ànùbènèshè! Nènku  
mpindyewu nèndombèku Mwanèètù wa mushinga mukolè  
Neville ní ùdikù mwà kutangalaja disangisha dilenga edi.

Nzambì mmunùnange, muntu ne muntu. Ndi ne kusàkidila  
kwàbùngì bwà kwikala ne bantu bu nwènù aba. Mukenji  
wànyì wùvwakù mwà kwikala cinyì bu ne ncivwa ne muntu  
nànsha umwe muWìtàbùùje? Ne kùdi bantu mwaba ewu, nudi  
bafwànyine kufwà bwàWù, bwà Mukenji wutùdì naawù ewu.  
Nzambì ànùkwàcishèku, muntu ne muntu. Masambila àànyì  
àdi neenù. Mabènèsha àànyì àshindikijèku yònsò wa kunùdì.  
Kanùpukù mwoyi ne nudi citùpà cyà dibùikà dyà ku lufù  
adi tó. Bukolè bufùluludi bùdì munda mwènù amu patùdì  
twakulangana apa. Byònsò byàmányì kulongolodiibwa. Wèwè  
udi mwàna wa Nzambì.

Twìnyikààyaaku mitù yètù, too ne pìikalà Mwanèètù Neville  
mutùtangàlaje. Nènku Nzambì ànùbènèshè. 

*KACYA NZAMBÌ ÛTUKÙ ÛSHINTULULA MMWÈNENU  
WENDÈ PA BÌDÌ BÌTÀNGILÀ DÌYÌ DYÈNDÈ ANYÌ? LUA65-0418E*

(Does God Ever Change His Mind About His Word?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, mu matùkù 18 a ngondo mwinâyì, cidimu cyà 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)